


EKALESIA FAAPOTOPOTOGA KERISIANO I AMERIKA SAMOA

**OFISA O A'OA'OGA KERISIANO**



**MAFUTAGA AUTALAVOU**



**FEPUARI - IUNI**

**2023**

## O LE UPU TOMUA

Manuia tele le tausaga Fou 2023. Tatou te vi'ia pea le alofa tausī mai o le Atua i lo outou soifua ma so matou ola. O lele ua to i tua Apolima, ina ua manu mai lagi le folauga a le Ekalesia. Sa taumate lava i le ete le soifua, a'o lea lava ua to pule le Atua ma ua tuta ai i nu'u manaia lou sa folau le Ekalesia. E moni lava sa tele fita o le ala sa tatou asa mai ai i le na tausaga, a ua fao lava le va'a o mala, ae lalaga le va'a o manu, i le pule alofa faito'atasi a le matai sili o le foafoaga. Foi i le Atua lona viiga ma le pule uma lava e fa'avavau fa'avavau lava. Malo le folau, malo le pale i le pa'ia ma le mamalu o le Ekalesia Fa'apotopotoga Kerisiano i Amerika Samoa. Susu Susuga i Toea'iina ma Faletua, susu foi Susuga i Fa'afeagaiga ma Faletua, le atoa o le Ekalesia i ona tulaga fa'alupeina, tulou lava. Fa'atalofa ma fa'afeiloa'i atu i le suafa manumalo o Iesu keriso le ao o le Ekalesia.

Ua tatou aulia mai lenei tausaga fou i le agalelei tausī o le Atua, sa a'ao ta'ita'ina lou soifua ma lo matou ola, ua tatou tepa ai i 'ula ma taga'i i 'ula i le alofa lavea'i o le Atua. Sa tuli tautaina lou soifua ma lo matou ola i faigata o le olaga, aemaise o le le fa'amalieina o le loto o le Koviti - 19, ina se'ia alu 'ese atu ia, ae ua saogalemu pea lau folauga ona o le Atua ta'ita'i malaga, e to'a i ai folauga i so'o se taimi ma so'o se faigata o le olaga. Tumau i le Atua le vi'iga e le aunoa.

Tatou lagona fa'atasi le agaga o le fa'afetai ma tatou fa'apea ane. Le Atua, o ai ea i matou o tagata ua e manatu mai i ai. A'o le manulauti o lau fonotele i le na tausaga, A'o e fa'atalitali i le Alii e fa'afouina lo latou malosī. Tumau i le Atua le vi'iga ma le fa'amanu e faavavau..

### **la silafia -**

1. Ua tu'uina atu le galuega mo le fesoasoani i le a'oa'oina o tatou fanau ma tupulaga i totonu o 'aulotu, e fesoasoani mo a outou Susuga i faiaoga. E fa'amoemoe lava o lo'o tatou ta liu pea i le va'a e tasi i le fa'aaogaina o tatou tusi. E le taofia foi lo outou fa'ama'ite mea lelei e fa'aleleia atili ai a tatou feau ma galuega..
2. Ua toe tuuina tusitusiga o Mati e oo ia luni o le tausaga ua te, mo le aoaoina, ina ua taofia aoga e le faamai. Ua mara ona toe teuteuina ina nei maumau le tautiga, ae le faaogaina.
3. O le a 'auina atu lava i tusitusiga le tele o a tatou polokalame mo lenei tausaga, a'o fa'agasolo ai ona tiute ma nafa 'ese'ese. Fa'amolemole silasila ane i le Kalena, ua i ai nisi o polokakame masani mo le silafia.

Le mamalu e, o le 'au faigaluega, matou te asuasū atu vai malu i pu'ega i o outou finagalo, pe afai ua i ai se auaunaga ua lape ai le Ofisa nei.

Ia fa'amanuia tele le Atua i le alo atu i galuega o le nei tausaga 2023. Ia saga'i ane 'ai o le tai i o outou faiva, manuia foi le ofisa nei. Ia fa'amanuia tele mai le Atua ia i tatou uma, tumau lo tatou olioli i le Alii e le aunoa, tatou te faia ai mea uma i le fiafia ma le saunia lelei.

Soifua ma ia manuia.

Faatonu ma le Ofisa.

**TUSI AOGA MAFUTAGA AUTALAVOU - 2023**  
**FA'ASOLOGA O MATAUPU O LE TUSI.**

<b><u>ASO/MASINA</u></b>	<b><u>MATAUPU</u></b>	<b><u>TUSI FAITAU</u></b>
1. Fepuari 05, 2023	<b>Su'esu'ega i le Tusi Paia</b> "Ia fa'amuamua le Atua"	Hakai - 1: 1 - 5, Hakai - 2: 1 - 23
2. Fepuari 12, 2023	<b>Fa'afinauga (Debate)</b> "Pe ua talafeagai ea i Samoa nei le tulafono" o le sauaina o fanau" (Child Abuse)	Faataoto - 26: 3 Efeso - 6: 1 - 4
3. Fepuari 19, 2023	<b>Fa'atalata'anoaga</b> "O le a se mea o unaia lou ola ma lou fa'amoemoe i aso nei?"	Failauga - 4: 4
4. Fepuari 26, 2023	<b>"Ia fiafia i lau Tusi Paia"</b> "O so'o e to'asefulu ma le to'alua o Iesu"	
5. Mati 05, 2023	<b>Su'esu'ega i le Tusi Pa'ia</b> "O le agasala muamua a le tagata"	Kenese 3: 1 - 19
6. Mati 13, 2023	<b>Fa'atalatalanoaga</b> "O le Ekalesia ma le ola atina'e o tupulaga"	
7. Mati 19, 2023	<b>Su'esu'ega i le Tusi Pa'ia</b> "Ia fa'amuamua ma fa'amamafa mea e tatau ona fa'amuamua"	Ne'emiasa - 6: 1 - 19
8. Mati 26, 2023	<b>Su'esu'ega i le Tusi Paia</b> "O folafolaga tu'ulafoa'i"	Ioane - 13: 31 - 38
9. Aperila 02, 2023	<b>Su'esu'ega i le Tusi Paia. (Aso Sa Laupama)</b> "O aga o le Poto o le Atua"	I Korinito - 2: 14 - 3: 3
10. Aperila 09, 2023	<b>Su'esu'ega i le Tusi Pa'ia (Aso Sa Eseta)</b> "O le fefe ma le olioli."	Mataio - 28: 1 - 10
11. Aperila 16, 2023	<b>Sailiiliga mai le Tusi Paia</b> "O fetalaiiga e fitu a Iesu i luga o le satauro"	
12. Aperila 23, 2023	<b>Su'esu'ega i le Tusi Paia.</b>	Mataio - 5: 43 - 48, Mataio - 10: 34 - 39, "Ia taitaiina ma malaga fa'atasi ma le Alii Toetu" Mataio 18: 21 - 35, Mareko - 15: 33 -34.
13. <b>Aperila 30, 2023</b>	<b>Fesili ma Tali</b> "Ia fiafia i lau Tusi Paia"	Ioane - 20 & 21



**ASO SA - FEPUARI 05, 2023. "SU'ESU'EGA I LE TUSI PAIA"**

**MATAUPU - "IA FA'AMUAMUA LE ATUA"**

**TUSI FAITAU - Hakai - 1: 1 - 15, Hakai - 2: 1 - 9, Hakai - 2: 10 - 19, Hakai - 2: 20 - 23**

**SINI** - la fa'amatala feau a le Perofeta o Hakai i le nu'u o Iuta, e tulimataina ai le feau o le su'esu'ega ia fa'amuamua le Atua i mea uma e faia e le tagata,

**O SINA FESOASOANI MO LE MATAUPU:**

### **1. Feau muamua a Hakai**

Pe tusa ma le 50,000 tagata Iutaia ua toe foi nei i lo latou nu'u mai Paelonia le nu'u sa fa'atafea i ai, ma ua latou nofoia ai Ierusalem. Peita'i, o le malumalu ma le lafanua lafulemu ua matua fa'atafunaina lava. Ona amata lea ona latou toe galuea'ina le fanua. Peita'i, e galulue fua ae pei lava e le malie le tu'u malepemelepe pea o le malumalu tapua'i i lo latou Atua. O le ala lea na tonu ai i o latou nanatu, e tatau ona fa'amuamua le toe fausia o le malumalu tapua'i i le Atua, ae mulimuli o latou fale. O le malumalu o le fale e afio ai le Atua, e tatau ona ave i ai le fa'amuamua. O le i ai o le malumalu i totonu o le nu'u o le fa'ailoga foi lea o lo'o fa'atsasi le Atua ma i latou. A'o le ata manino o lo latou fa'amuamua o le Atua i o latou loto ma agaga, aua e afua mai le Atua manuia o le nu'u.

Ua amata le galuega ma ua ma'ea le fa'avae, a ua toe suia foi manatu o tagata ma fa'apea ane. Se'i ta'atia le faiga o le malumalu, ae se'i fai muamua o latou fale e nonofo ai. Ona fa'apea foi lea ona fai, ua fa'asaga lava le tagata ia e fau lona fale. Pe tusa o le 16 tausaga mulimuli ane ai, talu ona toe foi ane le tafeaga, ae tula'i ane loa le perofeta o Hakai ma ta'u atu i le nu'u le fiinagalo o le Atua. O le feau muamua lea a Hakai ia Iuta, (Hakai - 1: 1 - 15)

### **2. FEAU LONA LUA A HAKAI**

Ua mavae foi ni nai masina ae toe fa'aali le Atua ia Hakai (Hakai - 2: 1 - 9). O le upu fa'amalosi mo le nu'u ina ia fausia le malumalu, o le fa'ailoga o le fa'amuamua o le Atua ia i latou. Ua uma foi ona folafola e le Atua o le a sili atu le mamalu ma le matagofie o le malumalu o le a faia nei, nai lo le malu-malu na faia e le tupu o Solomona. E le gata i lea ua fa'amanuia foi le Atua i le malumalu o le a faia nei.

### **3. FEAU LONA TOLU A HAKAI**

A'o le'i fa'atafea le nu'u i Paelonia, sa i ai lo latou taofiga i o latou loto e fa'apea, "Ona o lo'o i Ierusalem le malumalu o le Atua, le nofoaga o lo'o afio ai le Atua, o le mea lea, e le mafai ai e se malo ona fa'ato'ilaloina i latou. Ua latou talitonu i le Atua na te puipua i latou mai o latou fili." O le manatu lea, ua na o se foe lava sa fa'ae'e i le tau i o latou lagona faualuga, aua e le'i sao pe taunu'u, ina ua fa'atafunaina e Paelonia le malumalu ma le a'ai atoa.

O le ala lea o le fesili o Hakai i le tulafono i faitaulaga (f: 11), o le tali e LEAI. Na toe fesili lea o Hakai i le fuaiupu e 13, o le tali e IOE.

**O LE A LE UIGA O LE MANATU O HAKAI?** O le uiga o le manatu o Hakai, o le fausiaina o le malumalu. Po'o le i ai o le malumalu o le Atua i Ierusalem, e le o le fa'ailoga lea o le auai ma le pa'ia o le Atua i totonu o Ierusalem. E le o lima foi o tagata agasala e fauina ai le malumalu, o le a le pa'ia ai le malumalu, po'o lima o e amiotonu latou te fauina ai le malumalu, o le a pa'ia ai le

malumalu. E leai lava, o le agaga usiusita'i ma le alofa moni i le Atua, e manino ai le agaga moni ma le loto naunau atu e fa'amuamua le Atua i mea uma o le olaga, e fausia muamua ai le malumalu. Ia fa'amuamua le Atua i me uma latou te faia.

#### **4. FEAU LONA FA A HAKAI**

O le feau mulimuli a Hakai mo le nu'u, na tu'uina atu lava i le aso e tasi na tu'uina atu ai lana feau lona tolu. I lenei feau, e fa'atatau lea ia Serupapelu. O Serupapelu, o ia e i le 'au aiga o le tupu o Tavita. O ia o le Kovana o luta. O le feau la a Hakai, o le toe fausiaina o le malumalu, o le toe tula'i mai lea o le malo o luta, A ia manatua, le tautoga a le Alii i o outou tama, e i ai le aso e o'o mai ai le malo o le Atua, e ala lea ia Iesu le Alo o le Atua.

#### **UPU FA'AI'U**

O se feau ta'ua mo tupulaga i nei aso, o le fa'amuamua o le Atua i mea uma latou te faia ia fiafia mai ai le Atua ia i latou ma tatou uma foi. Aemaise lava o a latou filifiliga faia ina ia fa'atino lava i le tapasa lea, o le fa'amuamua o le Atua.

E tatalo atu lava i le loto maulalo i a outou Susuga ina ia fa'alautele pea ma fa'amalosi se feau ua taumafai atu mo a tatou tupulaga, ina ia folau fa'atasi ma le Atua i le nei tausaga e manuia ai faiva ma galuega fa'atino o le a tatou feagai ai.

Fa'ai'u i se tatalo e saunia e se tama'ita'i o le Autalavou.

#### **Ia manuia tele le savaliga o le nei tausaga.**

\*\*\*\*\*

#### **ASO SA - FEPUARI 12, 2023 "FA'AFINAUGA"**

#### **MATAUPU - "PE UA TALAFEAGAI EA I SAMOA NEI LE TULAFONO O LE SAUAINA O FANAU" (CHILD ABUSE)**

#### **FA'ATOMUAGA:**

E le o se mataupu fou lenei mataupu, o se mataupu ua leva ona tatou talanoaina ma fa'aali foi i ai o tatou lagona. Ua a'oa'oina i aoga ma ofisa o le malo, ua o'o lava foi i Ekalesia. Peita'i, o le va'ava'ai atu lava i lenei fa'afitauli, e pei e foliga mai lava ua fa'ata'alogi i vai e le to'atele, ua le gata ina a'afia ai fanau ma tupulaga, a ua a'afia ai foi ma tagata matutua. E pei ua le manatu mamafa lava i ai. E sili ona fa'anoanoa, e pei e foliga mai ua mata'utia atu le fa'atinoina o le sau ma le fa'ataumao'iina o tamaiti i le taimi nei, nai lo le taimi sa soifua ma ola a'e ai i si o tatou

atunu'u. O auala ua fa'atino ai ua tau oso ai le fefe, ma ua tauau ai ina le mautonu le faigamalo ma tagata galulue i se fofo talafeagai mo lea mala. Ua tataou molimau lava i ai i upega tafailagi ma so'o se ala fa'asalalau i le ogaoga ma le mata'utia o auala ua fa'ataumao'i ai e le isi tagata le isi tagata, ma sauaina ai foi ma fanau.

O le mea lea ua manatu ai e toe fa'amanatu ma fa'amalamalama nisi o mafaufauga fa'avae o lenei fa'afitauli, ina ia a'oa'oina ai pea tupulaga ma matua, aemaise i latou o lo'o fiafia pea i lea mea o le sauaina o fanau ma isi tagata. Ua leaga ea si sasa ma le uga a si lo'omatua sa a'oa'oina ma fa'atonutonu folau i le soifua tutupu a'e o fanau i o latou sese i aso ua mavae?

#### **FA'ATINOGA O LE MATAUPU:**

1. E leai se manatu e finau po'o ai e malo ma sili ona manatu, ae i ai le taofi o le finauga e fa'asoa ma fa'alautele le silasila i ni auala e a'oa'oina ai tatou uma i le fa'afitauli e fa'aleiloaga i nisi taimi, ae mata'utia i nisi taimi, aemaise foi o le taumafai pea e saili i le Tusi Paia, mo se tali o lea fa'afitauli.

2. O le faiga masani lava. O le a tele manatu e fa'aalia, ae ia to'a pea lau Susuga a le ta'ita'i i le fa'afoeina o le mataupu, ina ia ma'ea ane ua a'oa'oina tupulaga i ona itu uma e a'afia i lenei mataupu.
3. E lua lava vaega e vaevae i ai le Autalavou.
4. Ia fa'asoa lelei e lau Susuga le fe'avea'iina o manatu o itu e lua.
5. Pule foi lau Susuga po'o o le a le umi e fai ai le finauga ma le fa'asoa.
6. Ia mautinoa e leai se 'au e malo, ae fua i o latou manatu, o le fa'asoa lena ia a'oa'oina ai tupulaga mai itu uma e lua.

### **1. VAEGA MUAMUA: "LEAI" FA'AAOGAINA LE TUSI O FA'ATAOTO - 26: 3.**

Leai, e le tatau ona taliaina i Samoa lenei tulafono, ona o le tamaitiiti Samoa lava ia e a'oa'i, a'oa'o ma fa'atonu i le sasa. O le ala foi lea o le to'atele o tagata Samoa e taofi, o le olaga fa'amanuiaina o le tamaitiiti, o le sasa lava na afuafua mai ai. **Fa'ata'ita'iga:** A sasa mai e le faiaoga, e toe sasa foi e matua, a sasa mai e le faifeau, ua atili ai ona mafatia i le sasa a matua. Sa leai ni vevesi i le va o tagata, aua sa galulue fa'atasi tagata uma e fa'atonu ma a'oa'o tamaiti uma o se aiga ma se nu'u. E galulue fa'atasi matua uma, o Faiaoga ma FaiFeau ma tagata matutua ina ia manuia fanau a le nu'u, O le sasa lava pe fue pe afai ua tatau ai, sa 'apepele ai le olaga ta'ulelei ma le tusa'afia o fanau i aso ua mavae. Ua tele lava le suiga o Samoa. Ia manatua, o le sasa ae le o le fasi.

### **2. VAEGA LUA, "IOE" FA'AAOGAINA LE TUSI O EFESO - 6: 1 - 4.**

E taua ma aoga le tulafono i Samoa, ina ia puipua mai ai tamaiti mai manu'a o le tino, i le so'ona sasa a matua ma tagata matutua. E tatau ona taofia matua ma isi tagata e pei o Faiaoga ma Faifeau ma tagata e le feso'ota'i i gafa, ona sasaina fanau ma le fa'ale - tatau. E le poto se tamaitiiti i le fue ma sasa, ae tu'u pea o ia tau lava o le ta'u i ai e leaga le mea o lo'o ia faia. A sese tau lava o le fai i ai aua le toe faia, ona uma lava lea. E tele foi ma isi manatu o le a latou fa'aalia i le vaega ioe i le tulafono.

## **O NAI MANATU E FA'ATUPU MANATU MO LE MATAUPU E FESOASOANU ATU AI.**

### **1. FAUTUAGA:**

Ou te talitonu o le a tula'i mai se fesili po'o ni fesili, e pei o lenei - "O le a tonu lava le fa'atinoga o le Child Abuse? (sauaina po'o le fa'ataumao'iina)

Afai ae tula'i mai lenei fesili, e fautua atu e lelei ona tu'u e tali mulimuli, ae fa'agasolo pea le finauga ma le fa'asoa .

Afai foi e le maua mai e le mafutaga se tali mo lenei fesili, ona matua fa'amalamalama loa lea i le mafutaga vaega uma o le fa'atinoina o le child abuse, Aua e le mafai lava ona fa'asoa ma le maua uma le fa'amoemoe o le mataupu, pe a le tali i le fesili lea, **o a tonu lava ni fa'atinoga e fa'atatau tonu i le sauaina o fanau po'o le fa'ataumao'iina foi?**

## **O NISI NEI O VAEGA O LE SAUAINA MA LE FA'ATAUMAOIINA O FANAU IA FA'AMALAMALAMAINA:**

O le child abuse, e le o fa'asoina pe gata mai i manu'a o le tino pe a sasa, E leai, e fa'asino i le a'afia o le tagata atoa, tino mafaufau ma le agaga.

1. E mafai ona fa'asimo i le lafo o upu masoa, upu malolosi, leoleoa i tamaiti.
2. E mafai foi ona fa'asino i le le lelei o mea'ai ma lavalava.
3. E mafai foi ona fa'asino i le le lava o le malologa ona ua mamafa ma tele galuega.
4. E mafai foi ona fa'asino i le le maua o mana'oga o le tamaitiiti, ae fai a le ivi o matua
5. Fa'afiufiu, fai-aiga ma feusua'i ma tamaiti. (tulou)
6. Te'ena ma fa'ale-tauaina , ma le tau'aloaina manatu o tamaiti

7. Ma isi fa'atinoga o le a maua ane lava e tupulaga, ae a'ofai lelei e lau Susuga fa'amolemole mo le a'oa'oga taua mo le Autalavou

### UPU FA'AI'U

O le a ta'oto atu i se saunoaga fa'ai'u a lau Susuga a le Fa'afeagaiga e ta aofa'i ai le mataupu. O le a'oa'oga sili foi lena mo tupulaga e saga fa'alaei'au atili i le mata'utia o lenei fa'afitauli. A malamalama lelei tupulaga i nisi o mafua'aga o le fa'afitauli e pei ona tatou fa'asoa ai, ona manino loa lea ia te i latou, **o le sauaina po'o le fa'ataumao'iina o tamaiti ma isi tagata, o lo'o fa'asino i a'afiaga o le tagata atoa, ae le na o manu'a o le tino.** O se mataupu e va'ava'ai pea i ai ma le toto'a i se tali atu i lenei mataupu ina ia fa'aitiitia ma fo'ia loa. Ia maua loa se tali mautu e fa'ataua ai le tagata po'o le tamaitiiti atoa i le tino, mafaufau ma le agaga.

E a si a'u tali lea i le nei taimi, Ina tu'u maia o tamaiti e omai ia te a'u, aua le vavao ia te i latou, aua fa'apei o i latou nei, o e o i le malo le Atua. Fa'ailoga o le talia atoatoa o le tamaitiiti.

### Manuia tele le fa'asoa i lenei afiafi

\*\*\*\*\*

### ASO SA - FEPUARI 19, 2023 "FA'ATALATALANOAGA"

### MATAUPU - "O LE A SE MEA O UNA'IA LOU FA'AMOEMOE MA LOU OLA I LE TAIMI NEI"

### TUSI FAITAU - FAILAUGA - 4: 4

**SINI**-Ia a'oa'oina tupulaga ia mafai ona ola magafagafa i le olaga, ma saunia ia malamalama i malosiaga 'ese'ese o le soifuaga o lo'o una'ina a latou fa'ai'uga ma filifiliga e faia i le olaga faigata ua i ai nei.

### FA'ATOMUAGA:

O le fa'amoemoe lava o le fa'atalatalanoa o mataupu, ina ia lautele le silafia ma le a'oa'oina o tupulaga i tafa e fia o le olaga, ae sili ai ona a'oa'oina i latou ina ia malamalama ma iloa fai fa'ai'uga

tatau ma filifiiga sa'o, mo i latou lava ma lo latou olaga manuia i le lumana'i. O le Failauga e 4:4, o lo'o aliali mai ai nisi o talitonuga 'anoa ma le ta'ua e una'ia ai pea le fa'amoemoe o tupulaga i le Atua o lo'o tautai i o latou olaga. **"Ona ou manatunatu lea i galuega tiga uma, ma galuega manuia uma, a ua mata'uaina le tagata ona o lea mea e le la te tuao'i, o le mea fa'atauva'a foi lea ma le 'ai a le matagi."** (Iobeserved the basic motive for success, is the driving force of envy and jealousy"

O le mea mautinoa lava i le soifuaga, e i ai lava se mea o lo'o una'ia le ola o so'o se tagata. O le mea foi lea e tatau ai i so'o se tupulaga ma so'o se tagata ola lava ona i ai sona fa'amoemoe. **O le tagata e leai se fa'amoemoe o lona ola, ua le 'ese lava lea ma se va'a ua leai sona foepu, leai se aiga, ua na o se mea noa, e le o se tagata.** (A man without a purpose in life, is like a ship without a rudder, a waif, a nothing. a no man. (Thomas Carlyle)

O le tele o lomifiloi o lo'o fa'apupulaina ai le veape **una'i** po'o le **fa'atautaia** (drive), i le **tata'i** (guide), **pulea** (to control), **po'o le fa'atonutonu** (to direct). **O lona uiga, po'o le a lava le una'i po'o le fa'atautaia o lo'o fa'atonutonu ma pulea ma tata'i i ai ou lagona ma manatu ma mea e te fai, o lo'o ia te oe lava le nofoa o le kapeteni, e fa'afoe ai, ta'ita'i ai ma fa'atonutonu ai lou fa'amoemoe ma lou olaga.** E le taumate ua le masino le tele o tulaga o le olaga, o mea taua ma le aoga, o fa'alagona o le loto, e mafai ona una'ia lou fa'amoemoe ma lo'u foi ola. Ae ao lava ina ta mataala i nisi nei o lagona



## O LE A LA SE MALOSI O UNA'IA LOU FA'AMOEMOE MA LOU OLA I LE TAIMI NEI?

### 1. "TO'ATELE TUPULAGA PO'O TAGATA UA UNA'IA E LAGONA O SESE MA AGASALA" (Many people are driven by guilt)

O tupulaga po'o tagata o lo'o una'ia e lagona tiga ona o sese o ananafi po o le tuana'i, e pulea pea e le maasiasi o sese mai le tuana'i o lo'o manatua pea. Ua taumafai ai e fa'aaoga le ola e fesolasolata'i ai mai le maasiasi, ma taumafai e lafi mai sese ma agasala o lo'o tanuma'i. O le vaivai o ia lagona, ua latou fa'atagaina ia sese ma agasala o le tuana'i, e una'ina o latou tiga, ma afaina atu ai a latou taumafaiga lelei, mo se fa'amomeoe lelei sili atu i le lumana'i. Ina ua agasala ma sese Kaino i le silafaga a le Atua ona vavae ese mai lea i luma lava o le Atua. O le fetalaiga a le Atua ia Kaino, o le a e fa'asevasevaloina i luga o le foga'ele'ele. O se ata manino lea o tupulaga ma tagata uma ua ola i le olaga nei, o lo'o una'ia e lagona o sese ma agasala o le tuana'i. Ua na ona fesolasolata'i solo, ua leai se fa'amoemoe o le ola.

**Manatua lenei mea, e moni na tatou fananau mai le tuana'i, ae le o tatou o ni pologa e saisaitia i le tuana'i.** O le upu moni, e le pulea e o tatou tuana'i le fa'amoemoe o le Atua mo tatou uma.

Silasila foi ia Mose, na liliu e le Atua le Mose fasioti tagata, e avea ma tagata aoga i le Atua. O Kitiona le tagata palaa'i ae na liliu e le Atua e fai ma toa malosi, ma le le fefe. Atoa ai ma le anoanoa'i o tagata sese ma agasala o le Tusi Paia, na le taofia ai le fa'amoemoe o le Atua i ni o latou tuana'i, ae na fa'aogaina lava i feau aoga mo le Atua. **O le upu moni lava tupulaga, e mafaia e le Atua ona fai ni mea ofoofogia i le vaega o totoe o tatou ola. O le Atua e fai ma ana anava le faia o amataga fou o tagata e aofia ai ma oe le talavou. Ia taula'i pea lo ta fa'amoemoe i le Atua o amataga fou. Aua ne'i taofia e sese ma agasala o le tuana'i i taua mai le fa'aaogaina e le Atua mo ana feau lelei uma. "Amuia le tagata ua fa'amagaloina lona solitulafono, ma ua ufitia lana agasala. Amuia le tagata e le tausalaina e le Alii, e leai foi se 'ole'olega i lona loto" (Salamo - 32: 1 - 2)** O le a sou manatu i ai tupulaga i mea ua tutupu i le olaga nei ma le soifuaga ua tatou numia fa'atasi ai? Aua le una'ia e tiga i tatou ona o sese o le tuana'i ma ananafi, ae taula'i pea lo ta fa'amoemoe i le Atua e faia amataga fou i lo tatou ola.

### 2. TO'ATELE TUPULAGA UA UNA'INA E LE MANA'O INA IA TA'ULELEIA. (Many people and youths are driven by the need for approval)

O tupulaga po'o tagata e una'ia e le mana'o ia ta'uleleia, e alu uma le malosi e taumafai ai e fa'amalie mea uma o lo'o manana'o ai isi, ma i'u ai ina pulea e le mana'o o isi o latou ola. To'atele tupulaga ua matutua lava, o lo'o taumafai pea e tau fa'amalie mana'o le fa'amalieina o o latou matua. O le to'atele foi o isi, ua una'ia e a latou 'aumea mamae ina ia latou 'au'au fa'atasi i se mana'o e tasi, ae aua lava ne'i fa'asala ese. E ataata mai e mafuli tupulaga o aso nei e le una'ina e le 'au'au fa'atasi ma a latou uo po'o a'umea mamae ina ia loto i le mea e tasi, tusa lava po le matua matilatila lava le sese. Ae o le isi foi itu, ua mafai foi e le mana'o o le to'atasi ona una'ia le to'atele ina ia talilelei ai lona mana'o ma lona fa'amoemoe. (Manatunatu i kegi ua ta'atele i tupulaga i le varga lea). **O le upu moni lava tupulaga, o le mana'o ia ta'uleleia e o'o ai ina fa'aseseina tagata, ma tau atu ai i le to'ilalo.**

O le itu e fa'anoanoa ai, ona o i latou lava e malaga ma le motu o tagata, o i latou lava foi na e leiloloa ai lava i totonu o le motu o tagata. Ia manatua le mea moni lenei tupulaga, **"E le mafai ona tatou iloa auala uma e tau atu i le fa'aeaina, ae tasi le mea ua mautinoa e tau atu i le to'ilalo**

**(failure) o le taumafai lea e fa'amalie tagata uma."** E le mafai ona tatou fa'amalieina uma tagata. O se gagana ua tataou masani ai, ae lelei ona manatunatu ma mafaufau loloto i ai.

O le puleaina o lou olaga i manatu o isi tagata, o le a avea ma ala tatou te misia ai fuafuaga ma fa'amoemoega a le Atua i o tatou ola. **"O le upu lava a Iesu, e le mafai ona e auauna i ni matai se to'alua."** E i ai nisi malosi e mafai ona una'ia o tatou ola, ae taunu'u lava i le tini e tasi. E pei o le le fa'aaogaina lelei o taleni, o mafatiaga i mea le tataou, ma le olaga le fa'amalieina. Peita'i, e leai se mea e sili atu lona taua i lo tatou iloa lelei o le fa'amoemoe o le Atua mo lou ola ma lo'u foi ola. A leai se fa'amoemoe mo le ola, ona tutusa lea ma se gaoioiga e leai se uiga, po'o se malaga e alu e aunoa ma se tapasa, ia po'o ni galuega e fai pogisa i o latou aoga.

#### **UPU FA'AI'U:**

O le fa'amoemoe o lenei fa'asoa, o le a taumafai e fa'ama'ea atu i se taini o le lumana'i, ina ia mafai ona maumautaia le a'ano ma le taua o ia foi a'oa'oga ua maua mai mo i tatou uma. E fa'alagolago atu lava i le fa'alauteleaga a lau Susuga ma le Autalavou o le a 'oa ma nanea ai lenei taumafaiga. Tatou toe feiloai i le lumana'i mo le fa'aauauina o le nei fa'asoa taua fa'ale agaga.

#### **ASO SA - FEPUARI 26, 2023. "IA FIAFIA I LAU TUSI PAIA"**

##### **MATAUPU - "O SO'O E TO'A SEFULU MA LE TO'ALUA O IESU"**

**SINI - O le sini lava ia a'oa'oina pea tupulaga i le Tusi Paia i so'o se auala, ina ia fa'atupu ai pea lo latou fiafia e fa'aaoga le Tusi Paia ma tapasa o le olaga.**

##### **FA'ATINOGA O LE MATAUPU -**

1. Fa'amolemole lau Susuga e fa'amatala au'ilili so'o ta'ito'atasi o Iesu i le Autalavou, ia manino ia i latou o latou **fa'ailoga** (symbol), aemaise foi o o latou **i'uga** ta'it'atasi.
2. Ia vaelua le Autalavou i ali'i ma tama'ita'i, ona fa'amatala lea e lau Susuga so'o ta'itasi, ae ao ina usi lelei le fa'alogo a tagata uma i vaega e lua, aua afai e ma'ea, ona alo loa lea i le sailiga o le siamupini o le po.

##### **O le mataupu e fa'apea -**

1. E filifii e le vaega se so'o mai le to'asefulu lua sa e fa'amatalina latou te fa'atinoina. E tula'i le sui o le vaega ua filifili le latou so'o, ma fa'atino taga i se mea e fa'atatau i le so'o ua latou filifilia. E tai foliga i le ta'alogo o le ta'u mai i aso la, pau lona 'ese'esega, e leai se leo ua na o taga. **Fa'ata'ita'iga** - Afai ua filifili le vaega ia luta le fa'alata, ona tu lea i luga ma fai taga, o le fa'auouo ma sogi atu, o le fa'ailoga o le fa'alata, ae mate e le isi vaega, ona fa'apena ai lava lea ona felafoa'i.

O so'o e to'a sefulu ma le to'alua o Iesu, o le fa'ailoga lea o 'aua'iga o Isaraelu e sefulu ma le lua. E to'a sefulu ma le tasi e omai mai Kalilaia, ae na o luta le Sekara e sau mai luta.

##### **O SO'O O IESU -**

1. **O SIMONA PETERU** - O ia lea e foliga o le ta'ita'i lea o le to'asefulu ma le to'alua. O se faifaiva mai Petesaita, ae sa nofo i Kapanaumi. Na fa'aigoaina o ia e Iesu o Kefa, o lona uiga o le *papa*. O ia foi o se ta'ita'i o le ulua'i Ekalesia. **O lona fa'ailoga o le fuifui ki**. E mafua ona o le fetalaiga a Iesu o lo'o i le Mataio 16: 16 - 20. Na maliu i le tausaga 64 T.A, i le taimi o le sauaga a le Emeperoa Roma o Nero. *Sa fa'asatauroina ai o ia, e u i luga ona vae ae u i lalo lona ulu.*
2. **O ANETEREA** - O ia o le uso o Simona Peteru. O ia foi o se faifaiva. O se so'o muamua o loane le papatiso, ae tusa ma nisi o tala, ma aumaia e lona uso o Simona ia Iesu. Na mau

3. fa'atasi o ia ma lona uso o Simona i Kapanaumi. Sa fa'amisionare i Eleni ma Asia Itiiti., ma o i'ina *na fa'asatauroina ai o ia i le satauro e foliga i le ekise, ma o lona fa'ailoga foi lena.*
4. **IAKOPO LE MATUA** - O Iakopo ma lona uso o Ioane, fa'atasi ai ma Peteru, o i latou ia e foliga mai, e faifai mea fa'atasi. O Iakopo o se tasi o atalii o Sepetaio. O ia foi o se faifaiva mai Kalilaia. O lona tina o Salome lea na tutu ma Maria le tina o Iesu i talaane o lona satauro. O ia le ulua'i so'o o Iesu na maliu. *Sa vavae'eseina lona ao(ulu) e Herota i le tasaga 44 T.A.(Galuega - 12: 2), O lona failoga o le to'oto'o pe tusa ma le tolu futu le umi ma le ato 'asoa.*
5. **IOANE** - O Ioane ma lona uso o Iakopo sa fa'aigoaina e Iesu, o *fanau a le faititili.* (Mareko - 5: 17). O se so'o alofagia e pei ona taua i le Evagalia a Ioane. Ina ua uma le Penetekoso, na malaga loa i Efeso. Na ia aumau ai i'ina ma a'oa'o atu ai le finagalo o le Atua i Efeso ma Asia Itiiti. *Ua na o ia le so'o e le'i maliu fa'amaturu pe tagata valeina. Na maliu filemu ina ua matua o ia. O lona fa'ailoga o le gata uogo ma le Ipu uaina. E mafua mai i le tala i le ipu uaina sa fa'ao'onaina el e faitaulaga ina ia oti ai. Na ia inuina le ipu uaina ae le'i afaina ai.*
6. **O IAKOPO LE ITIITI** - Iakopo le la'iitiiti po'o le itiiti, ona e la'iitiiti mai ia Iakopo le uso o Ioane. O lona aiga atoa sa mulimuli ia Iesu. Na fa'amisionare i Palesitina ma Aikupito. O i'ina na fa'apea na tagata valeina ai o ia. *Na maliu fa'amaturu. O lona fa'ailoga o le 'ili. E fa'apea le tala o lea 'ili na 'iliina ai o ia se'ia o'o ina maliu ai.*
7. **IUTA** - (Galuega - 1: 13, Luka - 6: 16, Ioane - 14: 22). E fa'ale tele se fa'amatalaga ia te ia. *Sa fa'amisionare i Peresia ma maliu ai fa'amaturu. O lona fa'ailoga o le va'a faila, O se fa'amatalaga e fa'apea sa ia fa'aogaina le va'afaila i lana malaga fa'anisionare.*
8. **FILIPO** - O se uo lelei a Aneterea ma Peteru. E sau foi o ia mai Petesaita. O ia o se so'o e foliga mai o se so'o e matamuli toe ma. E foliga mai o lana lava matafaioi i taimi o mafutaga ma Iesu, o le va'aia o a latou mea taumafa. (Ioane - 6: 5 - 7) **Masalo o le mafua'aga lea o lona fa'ailoga, o le papa falaoa.** *Na maliu foi fa'amaturu i Asia Itiiti.*
9. **PATOLOMAIO** - O le tasi ona igoa o Natanielu. Na aumaia ia Iesu e Filipo. O ia e sau mai Kana i Kalilaia. (Ioane - 1: 45 -51). **O lona fa'ailoga o le Tusi Paia ma le naifi, aua sa fa'apea se tala na maliu i le naifi a'o faitau lana Tusi Paia.**
10. **MATAIO**- O le isi igoa o Levi, le ao lafoga i Kapanaumi, ina ua vala'auina o ia e Iesu. O le tusi muamua o le Feagaiga Fou, ua fa'aigoaina ia Mataio, ona e a'oa'o mai ia i fetalaiiga ma a'oa'oga a Iesu. E fa'apei ona aoina e Mataio ia tupe ma lafoga. **Ai o le mafua'aga lea na ave'a ai taga tupe e tolu ma ona fa'ailoga.** *Na maliu fa'amaturu i Aitiopo i Aferika.*
11. **TOMA**- O le isi ona igoa o Titumo o lona uiga o le masaga. Na ia ava ma fa'aaloalo ia Iesu ae sa tuai lava ona talitonu i le soifua manumalo mai i le tu'ugamau. Ua fa'aigoa ai o Toma le talitonu. Sa maliu o ia i Initia. A'o le'i o'o i Initia sa ia fa'a-Misionare i Suria ma Peresia ma Initia. *Na maliu i u na tafanaina ai o ia a'o tatalo. O lona fa'ailoga lena o le ū ma le sikuea a le kamuta.*
12. **SIMONA LE SELOTE**- O ia o se vaega o le Selote. O fili ia a Roma. Latou te te'ena le pule'aga fa'a-Roma. E fetauai ai fitafita Roma, a'o le'i vala'auina e Iesu. *Sa maliu ina ua fa'asatauroina o ia. O lona fa'ailoga o le matau i'a.* O le fa'ailoga o le na faifaiva. E sau mai i Kalilaia.

13. **IUTA LE SEKARA**- Ua na o ia e le sau mai i Kalilaia. Na ia fa'alataina Iesu. *Na ia sisiina lona ua ma maliu ai lava. O lona fa'ailoa o le talita lanu samasama.*

**UPU FA'AI'U** - Ia fa'ai'u i se saunoaga a Iau Susuga a le ta'ita'i e ta aofa'i ai le fa'amoemoe o le mataupu i lenei afiafi ma sona a'oa'oga taua mo tupulaga.

**ASO SA – MATI 05, 2023. “SU'ESU'EGA I LE TUSI PA'IA”  
MATAUPU – “O LE AGASALA MUAMUA A LE TAGATA”  
TUSI FAITAU – KENESE 3: 1 – 19**

**SINI** – Ia toe va'ai i se va'aiga faigofie i lea tala i le ulua'i agasala, aemaise o ni a'oa'oga t'ua ma le faigofie e tu'usa'o i tupulaga mo lenei vaitau.

**O SINA FESOASOANI MO LE MAT'UPU**

O le uiga faigofie o le upu Kenese e pei ona a'oa'oina ai I Aoga Aso Sa ma fanau laiti, **“o amataga.”** Au'ua talitonuina, o le tele o tala ma mea ua i lenei tusi, o amataga ia o mea e pei ona talitonuina e tagata Eperu. E pei o le amataga o le lalolagi, amataga o le tagata, o le ulua'i agasala, o le amataga o le lolo, o le nu'u muamua na osi feagaiga ma le Atua, ma nisi lava amataga e tele.

O le tala i le ulua'i agasala, o lo'o aliali manino mai ai i latou nei. Atamu, Eva, ma le Gata. E mafai foi ona fa'apea se manatu, pe a aofa'i le tala i lona fa'amatalaina i se manatu faigofie ma le pu'upu'u ona fa'apea lea, E atamai le gata, e fa'ase'e gofie Eva, ae mata valea Atamu. O le gata, o le ti'apolo lava lea, a ua fa'aliliu i le gata i le tala lea.

**FA'ATINOGA O LE MATAUPU – Fesili e felafolafoa'i ai**

1. Pule pea Iau Susuga a le ta'ita'i pe vaevae le Autalavou i ni vaega e sa'ilili ma su'esu'e ai, pe fetufa'ai fa'atasi.
2. E fa'amaonia fa'apefea le atamai o le gata?
3. O le a se uiga le alofa o lo'o aliali mai ia Atamu ma Eva i lenei tala? (silasila i le 1 Korinito – 13: 5)
4. E i ai se uiga leaga e ta'atele i tagata o lo'o aliali mai ia Atamu ma Eva i le fuaiupu e 8. O le a lea uiga?
5. O ai o le to'atolu lea e sili ona mamafa lona fa'asalaga? Atamu, Eva ma le gata.
6. Fa'amolemole ia tu'u pea le avanoa e fa'alatele ai le felafolafoa'iga ma tupulaga i fesili ua tu'uina atu, atoa ma nisi fesili e saunia lava e Iau Susuga a le ta'ita'i.

**NAI FESOASOANI MO FESILI O LO'O I LUGA**

1. O le fesili muamua e fesoasoani atu ai fa'apea, E iloa le atamai tele o le gata i lona fesuia'iga o le fa'atonuga a le Atua. (f : 1, “Ua sili le atamai o le gata i manu uma o le vao na faia e le Atua, ua fai mai o ia i le fafine, “E moni ea na fetalai mai le Atua, lua te **“le”** a'ai i la'au uma o le fa'atoaga? (fa'atusatusa i le Kenese – 2: 16 – 17)
2. O le fesili e lua, “E le tatau ona tu'ua'ina atu le leaga i le isi tagata, e iloa lelei lea i le fesili o le Atua ia Atamu, ae tu'ua'i ia Eva, fesili le Atua ia Eva, ae tu'ua'i i le gata. A faitau lelei ma manatunatu i le tali a Atamu i le Atua i le fuaiupu e 12, o lo'o manino lelei ai, le tu'ua'ina e Atamu o le Atua, (f: 12 – “Ona fa'apea mai lea o Atamu, o le fafine na **“e”** aumai ia te a'u, ua na aumai ia te a'u le fua o le la'au, ona ou 'ai ai lea.)”
3. O le fesoasoani mo le fesili lona tolu, o le uiga ta'atele lea i tagata, aemaise lava i tupulaga talavou, o le sola ma lalafi pe a o'o ina ses'e se mea e fai. (O le a le mea e tatau ona fai pe a sese?)

4. Mo le fesili e fa e fesoasoani atu fa’apea, O lo’u taofi o le tagata e sili ona mamafa lona fa’asalaga, o EVA, auā e lē gata i ona fa’asalaga fa’apitoa, ae aofia foi ma ia i sala a Atamu, o sala a tagata uma.

Fa’aiu i se saunoaga fa’ai’u a lau Susuga i le Fa’afeagaiga, ma se tatalo e saunia e le Peresetene o le Autalavou

## MANUIA TELE LE SU’ESU’EGA I LENEI AFIIFI

\*\*\*\*\*

### ASO SA – MATI 12, 2023. “FA’ATALATALANOAGA”

#### MATAUPU – “O LE EKALLESIA MA LE OLA ATINA’E O TUPULAGA”

**SINI** – Ia a’oa’oina Tupulaga ina ia malamalama i se tasi o taofiga masani e fa’apea, e lē aiā pe feso’ota’i le Ekalesia i le atina’eina o tupulaga i mea tau i le tamāoaiga”

#### FA’ATOMUAGA –

O ‘autu ma le fa’amoemoe o lenei fa’atalatalanoaga, o le saga a’oa’oina pea o ā tatou tupulaga ia mausalī ma malamalama i le sao tāua o le Ekalesia i le atina’eina (development) o le ola o tupulaga. Ia silafia, o le fa’amoemoe o le atina’eina i’inei, e lē o fa’asino pe fa’amamafa ai le tamāoaiga tau i le tupe, a’o le olaga o le tama ma le teine i ona itu uma, auā o le olaga lenā e ola ma soifua ai i aso uma, e ala i le feso’ota’iga ma le Ekalesia, e fau ai le ola o le talavou mo le lumana’i. O le fesili faigofie, e tatau ona sa’ili tupe tupulaga e atina’e ai le Ekalesia po’o mafutaga foi? O le taofi masani lava o lo’o fa’alogoina pea i nisi, e lē o se matafaioi a le Ekalesia le fa’ateleina o ni tupe, ina ia maua ai uma ni galuega a tupulaga. E lē o se galuega foi a le Ekalesia le faia o ni tulafono e aiaia ai le tupe. Fai mai le mau lea, o lo’o i ai lava i latou e gafa ma le matafaioi lea.

E lē fia finauina lea manatu, peita’i, ua ou manatu e fa’atalanoa le mataupu lea ina ia a’oa’oina ai tupulaga, i le sao tāua o le Ekalesia i le atina’eina o lo latou ola i le tino, le mafaufau ma le agaga. Ou te taofia lava, afai e lē o se tiute lea o le Ekalesia le fa’asino i tupulaga le atina’eina o lo latou ola ia tamāoaiga i le tupe, ma fa’aaogā mo le vi’iga o le Atua, ou te taofi ua pito tasi la le va’aiga o lea manatu, auā o le ā leai foi la se feso’ota’iga a le Ekalesia ma ona tupulaga i le a’oa’oina i le tamāoaiga i le tupe. O le ala lea e manatu ai, ia fa’alautele le talanoaga i le tamāoaiga i le olaga atoa o le teine ma le tama talavou, ae lē o le tupe. Ou te taofi, o le Ekalesia, e silasila toto’a i le afāina o tupulaga ma tagata uma ona o suiga fou pe afai o le ā fa’amamafa le atina’eina o tupulaga tau lava o le tupe. Ia a’oa’oina tupulaga ma tagata, **ina ia lē pulea o latou olaga e le tupe, a ia avea i latou ma matai o le tupe. Ia manatua, e leai se leaga o le tupe, o le ā tu’ua’ina ai fua, a ia a’oa’oina tupulaga e tāua lo latou sao ia saili tupe mo le atina’eina o le galuega a le Atua, auā o lo latou tiute lea i le lumana’i.**

O si manatu mai le Tusi Pa’ia e fai ma tā’iala o lenei mafaufauga – (Ioane – 10: 10e) “.....**ua ou sau ina ia latou maua le ola ma maua atili ai lava.**” Ua fa’amatalaina e Ioane i le mataupu lea le a’ano ma le uiga atoa o le soifua mai o Iesu, i le ata o le leoleo mamoe lelei, i se fa’amatalaina e matalua.

1. O le galue a isi leoleo mamoe e fa’aaogāina mamoe i ona itu uma mo le lelei o le leoleo mamoe.
2. A’o le uiga o le leoleoina e Iesu o mamoe, e tagatavaleina lona avea ma leoleo mamoe, ina ia fa’a – tagata tau’aloaina ai mamoe.

Tusa ai ma le taofi o Ioane, e finagalo le Alii ina ia aumai lona tamāoaiga ma lona tumu, e fa’atamāoaigaina ai lana fanau. O le a’ano moni la o lenei taofi, ia lē avea lo tatou i ai i tulaga Ta’ita’i, Peresetene, ma Faife’au o Autalavou, ma ala e taotaomia ai o tatou tupulaga mai le olaga atina’e. O feso’otaiga a le Ekalesia ma tupulaga, ia maua le a’oa’oina o tupulaga ina ia latou maua le agaga o le atina’e i so’o se auala, e aofia ai ma le tamāoaiga, e ala i ta’ita’iga i totonu o mafutaga

ma ‘aulotu, aemaise le Ekalesia. Ia a’oa’oina foi ma malamalama latou, ia lē o le tamāoaiga o lona uiga o le tupe, a’o le tino, mafaufau, ma le agaga.

Ou te taofi o i’inei e feso’otai ai tatou ma mea e tau o atina’e. Fa’ata’ita’iga – silasila i tulaga o a’oa’oga, E lē mafai e faiaoga se fa’amoemoe e fa’atino, pe ā aunoa ma le fesoasoani malosi a

matua. E lē mafai e matua se mea , pe ā lē fesoasoani malosi le Ekalesia e fa’amalamalama i tupulaga ma fanau le tāua o le lelei ma le lava o le a’oa’oina i a’oa’oga i ona po nei.

O le atina’e sili la o lo’o fia tulimataina nei, e fai ma a’oa’oga o le nei talanoaga, e tāua le ola atina’e, ae ia aua le fa’amamafaina itu tasi. Ia lē avea foi le faia o atina’e ma sa’iliga e a’afia ai le tupe ma ala e fa’apea ane ai, e lē o se tiute lea o le Ekalesia ma tupulaga, ua manino le taofi o loane, na afio mai lesu ina ia tatou maua le ola, ma maua atili ai lava. E fa’apefea ona fai o lea mea, ia lē nofonofo ma fa’apea ane, o le galuega a le malō po’o ai lava, le atina’e o i tatou ma tupulaga.

O le atina’e sili e tataua ona tulimataina e le Ekalesia ma tatou uma mo ana tupulaga i le taimi nei ma ona aso nei –

1. Ia a’oa’oina tupulaga ia iloa ma talitonuina le tāua o le atina’eina o le ola a’oa’oina i a’oa’oga.
2. Ia a’oa’oina tupulaga ia iloa le tāua o le atina’eina o ā latou taleni ma fa’aaogā mo mea lelei e ta’uleleia ma vi’ia ai le Atua.
3. Ia a’oa’oina tupulaga ia iloa le tāua o le atina’eina o le tamāoaiga e ala i le fa’aaogāina tataua ole tupe, ma ia avea ma matai o le tupe.
4. Ia a’oa’oina tupulaga ia iloa le tāua o le ola atina’eina o aiga, le tāua o le nu’u, le tāua o le ‘aulotu ma Ekalesia, aemaise le tāua o lona malō ma le atunu’u.

**Toe manatu** – E tāua tele le olaga atina’e o tagata uma. Ae sili ai mo tatou le Ekalesia le a’oa’oina o ā tatou tupulaga, ia malamalama i le ola atina’e, ina ia tamaoāiga i mea uma, i le tino , mafaufau ma le agaga. O le tamāoaiga i le tagata atoa, ae lē na o le tupe lea ua fai ma fa’ava’atuia i nisi, ona ua tafa tasi le silasila. Ona tutupu loa lea o manatu, e lē o se tiute lea o le Ekalesia le atina’e o se tamāoaiga o tupulaga i ni tupe. leai, e tāua le silafia, e lē o fa’aleaogāina e lesu le tupe, ae o le lapataiga malosi, **ia lē avea le tupe ma atua i le tagata, ae ia avea le tagata ma matai o le tupe.** Ia pulea e le tagata le tupe, ae lē pulea e le tupe le tagata. ‘Auā ua ou sau ina ia outou maua le ola ma maua atili ai lava”. E finagalo lava le Alii ia tatou tamāoaiga i le olaga, ae ia le na o le tupe, a’o mea uma, ia aogā mo lona vi’iga. O le feso’otaiga lea a le Ekalesia mo le atinaeina o le tamāoaiga o tupulaga. O le tama ma le teine talavou ia a’oa’oina ma malamalmama i le tāua o le ola atina’e mo le Atua e ala i le Ekalesia, i lona tagata atoa ua fa’atamāoigaina e le Atua i mea uma, tino , mafaufau, ma le agaga.

**Fesili e fefa’asoa’i ai** – E mafai foi ona vaevae le Autalavou ae finau i le fesili lea, ona amata loa lea o le fetufa’aiga.

“O se mea tataua po o se galuega a le Ekalesia le fesoasoani i le atina’eina o le tamāoaiga o tupulaga?”

### Manuia le Aso Sa

\*\*\*\*\*

**ASO SA – MATI 19, 2023. “SU’ESU’EGA I LE TUSI PAIA”**

**MATAUPU – “FA’AMUAMUA MA FA’AMAMAFAMA MEA E TATAUA ONA FA’AMUAMUA”**

**TUSI FAITAU – NE’EMIA – 6: 1 – 19**

**SINI** – Ia a’oa’oina le tupulaga ina ia fa’autauta ma mataala i mea uma, aemaise o mana’oga ma togafiti leaga a tagata o lo’o ita iā i latou. A ia fa’amuamua pea le atina’eina o le galuega a le Alii, ma galuega lelei uma o lo’o latou atina’e i le olaga e manuia ai.”

### **FESOASOANI MO LE MATAUPU,**

O le togafiti a tagata Arapi (tagata Samaria) ina ia maua ai se auala e fasiotia ai Ne’emia i lona toe atiina a’e o pa o Ierusalem. O nei tagata sa maua mai e Ne’emia ma Sā lutā ina ua toe foi le tafeaga, o lo’o nonofo i luga ma Ierusalem. Sa lē fiafia nei tagata i le toe faia ma fausia e Sā lutā o pa o le a’ai sa fa’aleagaina e le malō o Papelonia. Ua o’o lava foi i ta’ita’i o le nu’u e pei o Ne’emia, ua latou taumafai e mailei ia oti o ia. Sa latou feau fa’afā ia Ne’emia e alu ifo se’i o latou feiloa’i, peita’i, na te’ena fa’afā foi e Ne’emia, auā ua ia mautinoa lelei o le togafiti se’i o latou fasiotia ai o ia. Ua latou taumafai fa’alima, ae na manino ma iloa lelei e Ne’emia lo latou pepelo. (ff: 5 – 8)

Sa te’ena ma fa’amata’u muamua le nu’u e nei tagata (f: 9). Sa ‘au’au fa’atasi foi Semaia le Sā lutā ma nei tagata Arapi (f: 11). Na iloa lelei e Ne’emia e lē o le finagalo lea o le Atua (f: 12 – 13). Auā sa ia tu’uina atu pea i luma o le Atua i le tatalo nei tagata i lo latou tau fa’amata’u iā te ia. E ui ā la i taumafaiga a tagata Arapi e fa’aleaga le galuega, ae sa i’u manuia lava le fa’amoemoe o le nu’u. (f:15). Ua fa’avaivaia foi i latou i ā latou togafiti ma taupulepulega leaga, auā ua latou iloa o le Atua e ana le galuega e ala iā Ne’emia ma ona tagata. (9f: 16). Sa iloa lelei foi e Ne’emia le fa’avaivaia o le ola auauna ma le loto nu’u o nisi o Sā lutā, ona o le ‘oa ma le tamāoaiga o nei tagata ‘ese, aemaise ua fēnofoa’i nisi o nu’u ‘ese ma tagata o sā lutā. O le mafua’aga lea ua filifili sesē ai nisi o le nu’u, ma ‘au’au fa’atasi ai ma nei tagata ‘ese, e fa’aleaga le galuega a le Alii (f: 17 – 19).

### **FA’ATINOGA O LE MATAUPU–**

1. E leai lava se isi auala e maua ai le sini o lenei mataupu ma ona a’oa’oga mo tupulaga i lo le auala o le fefa’asoa’i ma a’oa’o.
2. Ia fa’asoa ma le Autalavou, ina ia tufa ane foi o latou manatu e uiga i le mataupu.

### **O fesili e tatala ai le fetufa’aiga –**

1. O le ā le tulaga (role) o Ne’emia ma lana galuega sa fai?
2. Na fa’aapefa ona iloa e Ne’emia, o lo’o faufau tagata ‘ese e fasioti iā te ia, ae aiseā foi?
3. O le a le mafua’aga na fesoasoani ai isi tagata Sā lutā i tagata ‘ese, e tete’e atu iā Ne’emia ma le galuega, o le atiina a’e o le pa, e pei o Semaia?
4. Aiseā e tatau ai ona tatou fa’autauta i tagata o lo’o fai i tatou ma o latou fili, po’o ita mai?
5. O ā ni togafiti leaga a le tiapolo ua faigofie ona pau’u ai tupulaga i nei aso, ma se’e ‘ese mai ai i le fa’amuamua o le mea e tatau ona fa’amuamua?
6. Fa’amolemole fa’aopoopo ane nisi fesili pe afai e lava lo outou taimi.

### **A’OA’OGA E TULIMATAINA –**

Afai e maitauina, ua vaevaeina atu le tusi faitau ise fa’apu’upu’uga e aofa’i ai le mataupu atoa. O le mea o lo’o manino mai ai, e lē tasi se a’oa’oga tāua mo tupulaga ma tatou uma o maua mai i lenei tala. E tāua foi le fa’ailoa pea i tupulaga ia a’oa’oga fa’amolemole. Ae tulimata’ina pea le a’oa’oga ua fai ma sini, ia ave le fa’amuamua i mea e tatau ona fa’amuamua. E lē o mea uma e i’ila o auro ia.

### **Manuia tele le sa’ililiga i lenei afiafi**

\*\*\*\*\*

**ASO SA - MATI 26, 2023. “SU’ESU’EGA I LE TUSI PA’IA”**

**MATAUPU – “O FOLAFOLAGA TU’ULAFOA’I”**

**TUSI FAITAU – IOANE – 13: 31 – 38.**

**SINI** – “Ia a’oa’oina tupulaga talavou ina ia iloa ma malamalama lelei i le leaga o folafolaga tu’ulafoa’i”

### **FESOASOANI MO LE MATAUPU –**

O le tala leni i le aga’i atu o Iesu i Ierusalem ma lana malaga i tala atu o le Ioritana. Ua latalata mai le taimi o lona fa’amasinoina ma lona maliu. Na faia ai e Iesu ma ona so’o le tausamiga o le paseka. O le tausamiga na fa’ailoa ai e Iesu i lona ‘au so’o le tagata o le ā ia fa’alaitina o ia. O le tusi faitau o leni mataupu, o lo’o fa’amafanafana ai Iesu i lona ‘au so’o. Ua ia ta’utino i le fa’amamaluina o ia e lona tamā, ma ua vi’ia foi le Atua i lona ola ofo atu. O ia foi o le Ala, Upu Moni, ma le Ola. E sili ona pele iā Iesu o lona ‘au so’o, o le ala foi lea ua ia fa’apea mai ai i le fuaiupu e 33, “La’u fanau e, ……….” Ua tu’uina mai ai ma le poloaiga fou ina ia latou fealofani fa’apei ona ia alofa atu iā i latou.

O le mea moni o lo’o naunauta’i i ai le finagalo o Iesu, o le avea ma so’o moni, o le avea lea o Iesu ma Ala, o le Upu Moni, ma le Ola. E mana’omia ai le tagata, e ‘ave lana fa’amamafa i lona vala’auina e avea ma so’o. O le tagata ua malamalama lelei iā Iesu ma ana a’oa’oaga, aemaise le fa’amoemoe na afio mai ai i le lalolagi. O le fa’amoemoe ina ia maua le ola fou e le tagata agasala i le taimi nei.

O le vaivaiga tele la o Peteru, o lona lē malamalama lelei i uiga o fetalaiga a Iesu. O lo’o fetalai Iesu i le mataupu lea e uiga i lona maliu ma ona puapuagā. Peita’i, ua manatu Sinona Peteru, o lo’o fetalai Iesu i se isi mea o Ierusalem e malaga atu i ai o ia. O le ala lea na fa’ailoa atu ai e Iesu iā Peteru e lē mafai ona ia alu atu i ai, se’ia i ai se aso. E ui i lea, na fai atu Peteru iā Iesu, Ou te tu’uina atu lou ola mo oe” O le tali mautinoa a Iesu i leni folafolaga tu’ulafoa’i a Peteru e fa’apea – E tu’uina atu ea lou ola ona o a’u, E moni, e moni, ou te fai atu iā te oe, e lē vivini moa, se’ia e fa’afiti fa’atolu mai iā te a’u. (O lo’o taunu’u leni folafolaga a Iesu iā Peteru i le loane – 18: 15 – 27, i le fa’afitia e Simona Peteru o Iesu i lona fa’amasinoga.

### **FA’ATINOGA O LE MATAUPU –**

1. Ia avanoa ni minute e faitau ai le tala ma mafaufau i ai.
2. Tu’u muamua le avanoa e fa’asoa ai lava le tagata ia i lana fa’auigaina o le tala, e lē o le Autalavou atoa, ae fua i le taimi.
3. A ma’ea lea, ona fa’asoa lea o le mataupu ma fa’amalamalama le tala, fa’amolemole ua na o se fesoasoani ua tu’uina atu, ae fa’alautele pea e lau Susuga a le ta’ita’i.

### **O nisi o upu ma o latou uiga –**

#### **1. Folafolaga – (Promise)**

O se ta’utinoga aloa’ia e ta’utino ai se tagata i lona matai, aiga, nu’u, atunu’u, mo se auunaga fa’apitoa o le ā ofoina atu ai le ola e tautua ma auuna ai. O se folafolaga e faia e se tagata a’o molimauina e lē o lo’o faia i ai le ta’utinoga ma nisi tagata, aemaise lava le Atua Soifua.

#### **2. Tu’ulafoai. (rash/thoughtless)**

O le so’ona fai ma le lē malamalama o se tala. O le leai o se fa’amaoni i le mea ua folafola ma ta’utino i ai o le ā fai.

#### **3. Paseka (Passover)**

O le tausamiga fa’apitoa a tagata Isaraelu e fa’amanatu ai le sopo’ia e le agelu a le Atua o fale o tagata Isaraelu, a’o fa’ataunu’u le mala mulimuli i le fasiotia o ulumatua a tagata ma manu a Aikupito. E fa’amanatu lea aso i le masina o Apipa (Aperila) i lona aso 10 - 14. (Esoto 12: 1 – 51).

#### **4. Polo’iga (Commandment)**



O se fa'atonuga fa'apitoa a le Atua ia usita'ia e le tagata e ola ai ma manuia ai. E mafai ona avea o se tulafono e fa'atonutonu ai le ola o le tagata. Afai e solia e se tasi ona agasala lea o ia ma fa'asalaina, auā o le agasala lava ma lona tau.

O Iesu o ia o le Alo o le Atua ua fetalai mai, ".....ia outou fealofani, fa'apei ona ou alofa atu iā te outou, ia fealofani outou.(Ioane – 13:34). O le poloa'iga po o se fa'atonuga fa'apitoa lea mai le Atua mo e ua filifili e ola tautua fa'amaoni mo Keriso.

### **TOE MANATU –**

E tele ni a'oa'oga tāua ma le aogā o lo'o aumai i lenei mataupu. Ua a'oa'o mai i le tāua o le faia o folafolaga, ma ia malamalama lelei i lona fa'atinoga. **O le lē malamalama lelei o Simona Peteru iā Iesu, i le ofoina atu o lona ola mo Iesu, o se folafolaga tu'ulafoa'i lea.** Peita'i, sa mulimuli ane iloa e Peteru lona fa'atauva'a, ma ua malamalama ai i uiga o fetalaiiga a Iesu.

O le 'anofale o lenei mataupu, e manatunatu ai i lenei taimi tāua, i le aga atu o Iesu i ona puapuagā. Ina ia folafola le ofo atu o le ola mo Iesu, ma fa'atino i le olaga e ola ai. O talavou ua alofaina e Iesu, ua filifili e mulimuli, ma tautua fa'amaoni mo Keriso, auā o ia o le Ala, Upu Moni, ma le Ola. Ia atagia lea i lo tatou ola i aso uma, ae lē na ona fai o folafolaga tu'ulafoa'i, ae ā o'o mai faigatā ma tofotofoga o le avea ma so'o, ona tatou solomuli lea ma pala'ai. E mana'omia le mulimuli malamalama, ae lē o le mulimuli lē malamalama e ta'uvalea ma sesē ai.

### **FESILI E FETUFA'AI AI.**

1. Pe afai o Iesu o le Ala, Upu Moni, ma le Ola, aiseā ea la ua fa'atuputeleina ai le gaogao pea o Aulavou iā tatou 'aulotu ae evaeva fa'ale-iloga lava isi?
2. O se agasala le faia o folafolaga tu'ulafoai, ae lē fa'atunu'uina?
3. Afai o se agasala, e i ai se auala e toe sagatonu ai le tagata?
4. Fa'amata e mafai ona e ta'utino i le Atua ni au folafolaga ua tu'ulafoai i le Atua, ae e te le'i malamalama i ai?
5. Mafaufau i lenei vaiaso, e i ai sou sao i le mamafa tu o le 'avega o lo'o amo e le fa'aola a'o aga atu e fa'amanatu le maliu ma le toetu?
6. E tatalo atu pea i le fa'alauteleina e lau Susuga a le ta'ita'i le mataupu o lenei Aso Sa.

### **Manuia tele le savaliga o le Leni**

\*\*\*\*\*

### **ASO SA – APERILA 02, 2023. "SU'ESU'EGA I LE TUSI PAIA) (Aso Sa o le Laupama)**

#### **MATAUPU – "O AGA O LE POTO O LE ATUA"**

#### **TUSI FAITAU – 1 KORINITO – 2: 14 – 3: 3**

**SINI** – Ia a'oa'oina ma toe polili i tupulaga ina ia malamalama lelei, o le poto o le Atua, e lē mafai ona o'o i ai le iloa o le tagata."

### **FESOASOANI MO LE MATAUPU –**

O le Aso Sa lenei ua fa'amanatuina e le 'au Kerisiano i le lalolagi, "O le Aso Sa o le Laupama" i lenei tausaga. O lo'o fa'atautu i le malaga fa'atupu a Iesu i Ierusalem. O le malaga na afio atu ai le Alii i ona puapuagā, ma fa'a'ailoa atu lona mamalu fa'ale - Atua i le lalolagi. Ua afio atu le Tupu o le foafoaga i le a'ai Pa'ia i luga o le asini. Peita'i, o le fa'ai'uga o lenei vaiaso pa'ia, e fa'ae'eina ai Iesu i luga o le satauro na faia e le tagata. E ui lava o le satauro o se mea valea i e lē iloa le Atua, ma fai foi ma mea e tausuai luitaia (1 Korinito – 1: 18 – 25). **Peita'i, o lo'o aliali a'e mai le satauro se mea silisili ma se mea matagofie nauā, e iloa ai e le lalolagi, o le Atua o le poto lava ia.** Taofi ua

nofofale i loto ma agaga fe’au i le tala o le malaga fa’atupu a e Alii. O le ala lea ua manatu ai, se’i tatou fa’asoa i se fe’au tāua, **o le silisili o aga o le poto o le Atua.**

### 1. **O AGA O LE POTO O LE ATUA.**

Ua fa’amanatu atu e le Aposetolo iā Korinito, e lē o i latou o ni tagata e ‘ese so latou tulaga mai isi tagata o le lalolagi. E lē fa’apea a maoa’e le poto i le fa’au’igaina o mea o le olaga, ona ta’ua lea o i latou o ni tagata ua maoa’e le atamai. Peita’i, o le mea pito sili ona tāua mo i latou ma i tatou foi i lenei vaitaimi, e iloa ai lo tatou atamamai, o lo tatou manatunatu lea i lo tatou vala’auina e ala i le Talalelei o le fa’aolataga ua tatou maua. **O aga ia o le poto o le Atua – e mai mea vālea ma mea vaivai i le va’ai a le tagata, i le mea sili e mitamita ai le Kerisiano, o lona fa’aolaina ma fa’asa’olotoina mai le agasala.** O le fa’amāina e mea vālea ma mea vaivai o e popoto ma malolosi, o le fa’avae lea o le amataga o le Talalelei i nu’u ‘ese. E fa’avae mai i tagata fa’atauva’a ma lē taualoa, auā o i latou ua fia maua moni le ola fou, mai saisaitiaga o le olaga. O lo latou maulalo ma le fa’atauva’a, ma le leai o se poto i le va’ai mai a tagata, o i’ina e vi’ia ai le Alii, auā ua talia ma popoto i le poto moni mai le Alii, e ala i le Talalelei iā Iesu Keriso. O le mitamitaga sili lea, ma o le poto sili foi lea mo so’o se tagata, pe afai e talia Iesu Keriso, auā o ia lava o le poto moni, na tu’uina mai e le Atua.

### 2. **UA AVEA IESU MA O TATOU POTO.**

O Iesu na tu’uina mai e le Atua e fai ma o tatou poto. O ia na filifilia e le Atua poto, e fai ma ala o le Fa’aolataga. Pe afai tatou te talia Iesu, ua iā i tatou foi le poto e molimau ai i le Fa’aolataga. Afai o Iesu o le poto, o ia foi o le Amiotonu, tatou te maua lana amiotonu, pe ā tatou fa’atuatua mausalī iā te ia. O ia foi o lē ua fa’apa’iaina i tatou mo ia, ua na o ia lava. O ia o lo tatou togiola ma le fa’aola. O lona maliu ma lona toetu, ua togiolaina ai a tatou agasala. Pe afai e toe afio mai o ia, ona ia avatu lea o i tatou i le fa’aolataga fa’avavau i lona malō fa’atasi ma ia. Tatou te fiu e sa’ili na o le poto o le lalolagi e lē atoatoa ai so tatou mitamitaga. E tāua le poto i mea ‘ese’ese o le lalolagi, peita’i, afai e o fa’atasi ma lo tatou sa’ili iā Iesu le poto sili liutino tagata a le Atua, ona fa’aolaina lea o i tatou.

### 3. **O NISI O MEA FA’ATAUVA’A NA FAIA E LE ATUA E FA’AALIA AI LONA POTO.**

1. Sa fa’aaogāina e le Atua pu e solo ai i lalo pa o Ieriko. (Iosua – 6: 20 – 25)
2. Sa faatoilaloina e Kitiona ma lana autau e 300, le autau e 32,000 a Mitiana. Fa’amasino –7: 1–23
3. Sa fa’aaogāina e le Atua i le lima o Samekara le tui povi (oxgoad) e fa’atoilalo ai Filisitia e to’a ono selau. (Fa’amasino – 3: 31)
4. Sa fa’aaogāina e le Atua le ivi – ‘auvae (jawbone) o le asini i le lima o Samasoni e fa’atoilaloina ai le ‘autau uma a Filisitia. (Fa’amasino – 15: 15)
5. Na fafagaina e le Alii o Iesu, e sili atu i le 5, 000 tagata i areto karate e 5, ma ‘ia e lua lau. (Ioane – 6: 8 – 14)

### **A’OA’OGA E TULIMATAINA –**

O aga o le poto o le Atua tatou te ofo tele ai lava. O le poto e amata mai i le fa’aaogāina o mea vaivai se’ia o’o atu i le fa’aeaina. Ua tatou sa’ili le poto salalau i a’oga ma lunivesite ua a’o’oga ai, o se mea aogā ma le tāua tele lea. Ae ua a’oa’o mai lenei mataupu ina ia tatou sa’ili foi iā Iesu le poto moni, ia maua o ia. E tāua tele le atamai i le poto salalau, peita’i, ua a’oa’o mai le Tusi Pa’a, afai ua na o le poto o le lalolagi ua tatou manatu tatou te manuia ai, ona vaivai lea ma lē sa’o lea manatu, aemaise pe afai o le manatu lea o tupulaga i aso nei. Aiseā, auā e lē atoatoa ai se mitamita o le tagata. E lē gata i lenā, ae lē fa’aolaina ai foi se tasi. O lo tatou popoto i le iloa o Iesu tupulag e, e lē na o upu, ae fa’atino ma ola ai i aso uma, i lau amio ma le ola fa’apa’iaina. E masani ona fa’apea

tagata matutua i se tama ma se teine amiolelei – matuā atamai ma tausā'afia uiga ma amio a si teine o Pai, e 'ese le amio solia o Lafai, o lo'o fa'atatau upu ia i le poto fa'a -kerisiano ua tatou ola ai. (mafaufau ma le amio)

**Fa'aiuga** – O le ā ta'oto atu i lau Susuga a le ta'ita'i ma le Autalavou le fa'agasologa o le mataupu i lona fa'atalanoaina. Saunia foi ni fesili e tatala ai manatu o tupulaga ma fa'asoa i ai. Aua ne'i noatia i si fesoasoani ua tu'uina atu fa'amolemole le mataupu, ae fa'alautele pea i tupulaga ina ia uigā ma ānoa le fe'au mo i latou.

### **Manuia tele le Aso Sa o le Laupama.**

\*\*\*\*\*

#### **ASO SA – APERILA 09, 2023. “ FA'ATALATALANOAGA” (Aso Sa o le Eseta)**

#### **MATAUPU – “O LE FEFE MA LE OLIOLI**

#### **TUSI FAITAU – MATAIO – 28: 1 – 10**

**SINI** – “Ia a'oa'oina ma malamalama tupulaga i lagona na lagonaina e tinā na ala usu i le tu'ugamau, o le fefe ma le olioli ina ua la va'aia le tu'ugamau tu'ufua, e tusa ole tala a Mataio.

**FA'ATOMUAGA** – Ina ua fa'amatala e Mataio le tala o le fa'aaliga o Iesu i tinā i le ma'ea o lona toetu, o lo'o talanoa ai i le fefe ma le olioli. O le toetu o Iesu, e lē se mea masani ona tupu. O le toetu o Iesu, o le fa'afēlavei silisili 'ese lē fa'amatalaina a le Atua i le talafa'asolopito o le lalolagi. O le mea na saunia lava i le finagalo faito'atasi o le Atua i lona lava taimi e tusa ai ma lona finagalo, i ona lava aso. O le tupu o le toetu ma va'ai atu i le tu'ugamau ua tu'ufua, o le lauālugā lava o lagona o le fefe. Ae o le mea ua iloa nei, ina ua amata ona tatou talitonu i le moni o le toetu, o lo'o folafola mai e Mataio ma isi evagalia, ona tatou iloa loa lea o le moni o le Alii i o tatou olaga. **Ona tatou aga'i atu loa lea mai le fefe i le olioli.**

**O LE TALA** – O le tala i le toetu e pei ona fa'amauiina e Mataio, o le tala i nai tinā sa alausu ina ua tafa ata o le ulua'i aso o le vaisapati. Sa o e asiasi i le tu'ugamau o Iesu e tusa ai o ā latou tu ma aga. Peita'i, ina ua lā latalata atu i le tu'ugamau, ua fa'afuasei ona to o le mafu'ie tele, ma ua alu ifo le agaelu mai le lagi, ma fuli 'ese le ma'a tele na pupuni ai le gutu o le tu'ugamau, ma tietie i ona luga. E pei o le uila lona tino mai, ma ona ofu ua sinasina e pei o le kiona. O le molimau a Mataio, sa i ai i latou na tofia e leoleo i le tu'ugamau (Mataio – 27:62 – 66). A e peita'i, ua avea le fefefe ma le matāta'u o e na leoleo i le tu'ugamau, ma ala ua liua ai i latou e pei o tagata oti.

Ona fa'apea mai lea o le agaelu i nei tinā, *“Aua lua te matatau, auā ua ou iloa ua oulua sa'ilia mai Iesu na fa'asatauroina, E lē o i'inei o ia, auā ua toetu mai o ia, pei ona fetalai atu ai o ia, omai inā matamata i le mea na tu'u ai o ia. Inā o atu ia ia vave, lua te tau atu i ona so'o, ua toetu mai o ia nai e ua oti, fa'auta foi, e muamua atu o ia iā te outou i Klailaia, ua ou fai atu iā te oulua.”* O le molimau a Mataio, **Ona la vave o ai lea nai le tu'ugamau ma le fefe ma le fiafia tele.** O le totonugālemu lea o le tatou fa'atalatalanoaga i lenei Eseta. E moni lava sa lagonaina e nei tinā le fefe ma le fiafia tele i le taimi e tasi ina ua fa'alogao i le leo o le agaelu, e manatu foi, ua matuā olioli tele i la'ua i le tala, ua toetu Iesu. Fesili, Aiseā ua lagona ai e nei tinā lagona e lua i le taimi e tasi?

O le fefe, o se lagona fa'ale- tagata e 'ese'ese ona mafua'aga ma lona fa'apogai. –

1. E lagona e le tagata le fefe, pe ā tulai mai se tulaga e lamatia ai lona ola.
2. E lagona e le tagata le fefe, pe ā lagona le atu mo ni mea tetele e fa'atino, ne'i le tau lau o le fa'amoemoe.
3. A lē mautinoa ma lē malamalama le tagata i se mea, na te lagonaina le fefe ma le mata'u.

4. Afai foi e lē mafai ona taliaina i lona mafaufau, pe lē mafai foi ona ia fa'amatalaina i se auala e malamalama ai se mea, e lagonaina lava e le tagata le fefe ma le pala'ai.

Fai mai nisi o foma'i o le mafaufau, o le fefe lea e ta'ua o le, ***fear of the unknown*** po o le ***fear of the unexplained***. O le fefe e afua mai i le lē iloa, le talitonu, ma le lē mautinoa, o le ituaiga fefe lea sa lagona e nei tinā e to'alua sa o e asiasi i le tu'ugamau o Iesu, ma ua la iloa atu ai le tu'ugamau ua avanoa. (empty grave).

#### **FA'AMAMAF A MATAIO -**

O le fa'amamafa lava lea a le evagalia a Mataio – **o le tu'ugamau ua tu'ufua**, e fa'amaonia ai le moni o le toetu o Iesu mai le oti ma le tu'ugamau. (*This is to say, Mathew places special emphasis on the empty grave, to serve as concrete proof and evidence of the resurrection.*) O le fiafia sa lagonaina e nei tinā e to'alua, e mafua ona ua liua lo la fefe ma le lē mautonu, lo la loto vaivai ma le fa'anoanoa, ua suia nei i le fiafia ma le olioli tele. O le fiafia lava lea ua ala ai ona la taufetuli e ta'u atu i le 'au so'o lenei Talalelei, fa'auta foi ua laua fetai'i ma Iesu ua toetu. Ua fetalai atu foi o ia iā te i laua, aua lua te matatau, inā o atu lua te ta'u atu i o'u so'o, ina ia latou o atu i Kalilaia, latou te iloa mai ai 'au.

**Upu fa'ai'u** – E tele tāua o le Talalelei e uiga i nei aso, peita'i, e tāua foi le saga fa'amanatu pea i tupulaga ma a'oa'oina pea le tala o le toetu ina ia lē se'e 'ese lo latou talitonuina o le toetu o Iesu, ona avea ai lea o le toetu ua lē moni ma uigā i le fa'atuatua o tupulaga mo le lumana'i. Ia totō pea i loto o tupulaga o le toetu o Iesu lo tatou Alii Fa'aola, o le faamoemoe fou lava lea mo i tatou ma tagata uma. O le fa'ailoga o le fa'atoilaloina o le malosi o le oti ma le tu'ugamau e le alofa tunoa ma le mana lavea'i o le Atua soifua. O le tu'ugamau ua tu'ufua ma iloa atu e nai tinā, o le fa'ailoa mautinoa lava lea, ua toetu mai Iesu, Ae lē gata i lea ua avea lava le tu'ugamau tu'ufua ma ala ua liua ai le fefe ma le lē mautinoa, i le fiafia ma le olioli tele. O le toetu foi o Iesu, o le fa'ailoga manino lava lea, o le pule aoao ma le silisili 'ese o le Atua i le lalolagi ma mea uma na ia faia. O le fa'amoemoe fou ia toe fuata'i ai le ola, ma ola ai fa'a-toetu tagata uma. O le manuia e aofia ai tagata uma i le ola e fa'avavau.

#### **FESILI E FEFA'ASOAA'I AI, E FA'ATUPU MANATU –**

1. O ā ni mafua'aga e lagona ai e le tagata le fefe ma le mata'u?
2. O ā ni mafua'aga e lagona ai e le tagata le fiafia ma le olioli tele?
3. O le ā le uiga o le tu'ugamau tu'ufua? E fa'aapefe ona liua lo tatou fefe ma le mata'u, i le fiafia ma le olioli tele.
4. O le ā le uiga o le toetu mai le oti ma le tu'ugamau mo oe le tama ma le teine talavou i le taimi nei?
5. E fa'aapefea ona iloa le tama ma le teine talavou ua ola fa'a – Iesu Toetu?

#### **Ia manuia tele le Eseta, malo le fa'amalolosi**

---

**ASO SA - APERILA 16, 2023. "SAILIILIGA MAI LE TUSI PAIA"**

**MATAUPU - "O FETALAIGA E FITU A IESU MAI LUGA O LE SATAURO"**

**SINI - Ia fa'amanatu ma fa'amausali i tupulaga fetalaiiga e fitu a Iesu i luga o le satauro, a'o le'i maliu o ia , ma tusi o lo'o tusia ma ta'ua ai.**

#### **FA'ATINOGA O LE MATAUPU -**

1. Ia vaevaeina le Autalavou ini vaega e talaveagai lelei ma le aofai o le mafutaga, ia lua pe sili atu foi.

2. Ia faailoa i ai tusi e sailiili ai i fetalaiga e fitu a Iesu i luga o le satauro, ua na o tusi a Fai-  
evagalia e to'afa. (Mataio, Mareko, Luka ma Ioane)
3. Ia tu'u i ai se 10 - 15minute e sailiili ai i vaega pe latou te mauaina ia fetalaiga, ma tusi o lo'o  
fa'amauina ai.
4. Ia toe potopoto fa'atasi ma fa'asolo loa e fa'ailoa i le Autalavou atoa i'uga o sailiiliga a  
vaega taitasi. Ia iai se sui o le vaega e gafa ma le tolaulauina o a latou tali o sailiiliga.
5. Fesili e su'esu'e ai - Ta'u mai fetalaiga e fitu a Iesu i luga o le satauro a'o le'i maliu o ia? Ta'u  
mai tusi o Evagalia e fa o lo'o fa'amauina ai ia fetalaiga, ma fa'amatala mai?
6. O lo'o i lau Susuga a le ta'ita'i se fa'ai'uga lelei o le fa'atalatalanoaga, ma fa'amalamalama  
lelei i tupulaga ia fetalaiga ia le toe galo i tupulaga.

### **FESOASOANI MO LE MATAUPU -**

I sailiiliga ma su'esu'ega i le Tusi Paia, e tusa ma le fitu fetalaiga a le Alii Fa'aola i luga o le satauro, a'o le'i maliu o ia ma to lana manava. O lo'o fa'amauina uma ia fetalaiga e fitu i evagalia e fa, A'o le mea ua mautinoa, o isi fetalaiga e maua i isi evagalia, ae le maua i isi. O isi foi fetalaiga e eseese le fa'apuina i isi evagalia mai isi evagalia. Peita'i, o le mea taua ia manino tupulaga, e fitu lava fetalaiga a Iesu i luga o le satauro a'o le'i maliu o ia.

### **O FETALAIGA E FITU A LE ALII I LUGA O LE SATAURO.**

1. **“Eli, Eli, lama sapatani”** - (Mataio - 27: 46) - O lona uiga pe a fa'amatalaina, **“Lo'u Atua e, Lo'u Atua e, se a le mea ua e tu'ulafoa'i mai ai a'u?”**

O lo'o tusia foi lea fetalaiga i le Mareko - 15: 34, a'o le fa'apuga muamua, ua suia i le **“Eloi, Eloi, lama sapatani .....”**

I le tala fa'amauina a le tusi o Mataio, o le fetalaiga leni a le Alii na fa'alogi i ai nisi o tagata ma latou fa'apea ane, o lo'o vala'u o ia ia Elia. Ona momo'e lea o le tasi tagata ma fufui le omomi i le vineka ma tu'u i luga o le la'au ma fa'ainu ia te ia. Na te'ena e le Alii ona latou fa'apea ane lea, tu'u ai pea ia se'i tatou iloa pea sau Elia e fa'aola ia te ia. O le milomau foi lea o lo'o fa'amauina e Mareko

2. **“Lo'u Tama e, ia e fa'amagaloina atu ia te i latou, aua ua latou le iloa le mea ua latou faia”**  
O lo'o fa'amauina lea fetalaiga i le Luka - 23: 34. O le fetalaiga leni a le Alii o Iesu na faia i tagata luitaia na latou fa'asatauroina o ia. Na latou ave i ona ofu ma tufatufa ia i latou, e ala i lo latou faia ai o le vili.
3. **“E moni, ou te fai atu ia te oe, o le aso ta te fa'atasi ai ma oe i parataiso.”** O lo'o tusia ma fa'amauina le fetalaiga lea a Iesu i le Luka - 23: 43. O le fetalaiga leni a Iesu na fai atu ai i le tasi o pagota na fa'asatauroina fa'atasi ma ia. Na fetalai Iesu i le fetalaiga lea ina ua fai ane le pagota ia Iesu, ia e manatua mai a'u pe a e afio i lou malo.
4. **“Sena e, fa'auta o lau tama , fa'auta o lou tina.”** O lo'o tusia lea fetalaiga i le Ioane - 19: 26 - 27. O le fuaitau muamua, **“Sena e, fa'auta o lau tama.....”** na fetalai ai Iesu i lona tina a'o tu o ia e latalata ane i le satauro. O lona tina na fa'atasi ma Maria le ava a Kaleopa, Maria le Makatala, ma le so'o na alofaina e Iesu.  
O le fuaitau lona lua, **“Fa'auta o lou tina.....”** na fetalai ai Iesu i le so'o na alofaina e ia. E fa'apea le taofi, o le so'o itiiti lea ua igoa ia Ioane.
5. **“Lou Tama e, ou te tuuina atu nei lo'u agaga i ou a'ao.”** O lo'o tusia ma fa'amauina i le Luka - 23: 46. I le tala fa'amauina a le evagalia a Luka, ina ua uma ona fetalai Iesu i le fetalaiga lea, ona to ai lea o lana manava. O le ofoina atu e Iesu o ia lava i lona Tama. Ina ua uma lea fetalaiga a Iesu, ua iloa ai e le ta'ita'i o le to'aselau, o le tagata amiotonu lava ia.

6. **“Ou te fia inu.”** O lo’o tusia ma fa’amauina i le loane - 19: 28. I le tala a le evagalia a loane, o lo’o tusia ai e le tusitala e fa’apea, ina ua silafia e Iesu ua uma ona taunu’u o mea uma, ona fetalai ai loa lea o ia i le fetalaiga lea, Sa i ai le fagu vineka ua tu’u i luga i le isopo, ma tu’u atu ai i lona fofoga. I le tala a le evagalia a loane, na talia e Iesu le vineka.
7. **“Ua taunu’u.”** O lo’o fa’amauina ma tusia le fetalaiga lea i le loane - 19 - 30. I tala fa’amaumau a le evagalia a loane, ina ua una lea fetalaiga a Iesu, ona fa’agaugau lea o lona ao, ona tu’uina atu lea o lona agaga i le Atua.

#### **FA’AI’UGA MA LE FA’AMOEMOE TULIMATAINA -**

Ua manatu lava i le taua o le iloa ma taofi nisi o a’oa’oga taua ma le silafia o tupulaga i tala o le Tusi Paia. O le toe aumaia pea o nei fetalaiga a le Alii, ia saga fa’amamafa ai le iloa ma taofi mau, aua e talitonu lava e le o maua pea e tupulaga uma a’oa’oga o nai tala ia, ae taua pea le silafia e tupulaga ma fanau. O fa’amatalaga ma tusitusiga a fai evagalia na fa’amaumauina fetalaiga ia a le Alii a’o le’i maliu o ia, e taua lava le manatua pea lava pea e fanau, aua ne’i fesiligia i se aso ae tali mai i le iloa. O se mataupu e ao ina fa’amanatu pea i tupulaga ma tatou uma ina ia le toe galo. Ae sili atu ai, o le a’oa’oina ai o tatou uma ma tupulaga i ni a’oa’oga taua ma le ‘anoa mo lo tatou ola fa’aleagaga, ma le savalaiga o le olaga nei

E fa’aiu pea i se saunoaga fa’amalosi ‘au a lau Susuga a le tai’ta’i e polili atili ai le fa’amomoe o le mataupu ona fa’ai’u loa lea i le tatalo a le Alii.

#### **Malo le fa’amalolosi, fa’afetai le onosai’.**

\*\*\*\*\*

#### **ASO SA - APERILA - 23, 2023. “SU’ESU’EGA I LE TUSI PAIA”**

#### **MATAUPU - “IA TA’ITA’IINA MA MALAGA FA’ATASI MA LE ALII TOETU”**

**TUSI FAITAU - Mataio - 5: 43 - 48, Mataio 10: 34 - 39, Mataio - 18: 21 - 35, Mareko - 15: 33 - 34**

**SINI** - Ia avea lenei mataupu ma avanoa e iloa ai e tupulaga ona fa’afeso’ota’i le malaga fa’atasi ma le Alii Toetu, ma le olaga o lo’o soifua ai i le taimi lenei o le olaga. Ia latou iloa pe fa’apefea ona ta’ita’iina ma malaga fa’atasi ma Iesu, ae pe i ai foi se taua o le ta’ita’iina e le Alii toetu o le talavou.

#### **O NAI MAFAUFAUGA MA NAI FESILI E TA’IALA AI LE SAILIILIGA TAOFI A TUPULAGA.**

E pei ona taumafai atu, o le mataupu lenei o le a tatala lava le avanoa i tupulaga e fa’asoa sa’oloto ai i latou. E leai foi se taofi e sili a’e le manatu o le isi talvou i le isi talavou, e leai. E maua luga le taofi, o latou manatu o le a faaalai, o le a le fa’aleagaina se manatu, ae o le a ta’oto atu lava i lau Susuga a le Fa’afeagaiga i se aotelega o manatu e fa’ataua uma ai o latou taofi. A’o le fa’amoemoe, ia iloa e le talavoau lava ia ona fa’afeso’ota’i le soifuaga o lo o soifua ai, ma le ta’ita’iga a le Alii Toetu.

#### **MANATU FA’AVAE:**

E fa’apea se manatu, o Iesu foi ia, sa avea ma tamaitiiti se’ia o’o lava foi ina avea ma talavou, ae sa ia va’ai lava i le Atua o lona Tama lea. O lona uiga, sa fa’amoemoe lava Iesu i lona Tama i le ta’ita’iga o lona soifuaga a’o i ai i le olaga. O se so’otaga ua mafai foi ona tatou fa’amatalaina i le ta’ita’iga a matua o fanau i le olaga aga’i i luma, mai le laiti seia o’o ina matutua. Afai sa avea Iesu ma tamaitiiti, ma manino i lona soifuaga lana va’ai atu i lona Tama la te malaga fa’atasi i taimi uma ma ta’ita’ina o ia i le malaga ai i le olaga nei, o lona uiga, e le itiiti foi le taua o le va feso’ota’i atu a so’o se talavou lava ia i le Atua. Fa’apei ona usiusita’i ma fa’alogo Iesu i lona Tama, e tatau foi ona fa’apea so’o se talavou i le olaga nei, e fia maua manuia tumau mai le Alii.

## FESILI E AMATA TATALA AI MAFAUFAUGA:

1. O a ni mafaufauga sa ia te oe e uiga i le Atua a'o avea oe ma tamaitiiti?
2. A'o a foi la ni mafaufauga e uiga i le Atua o lo'o ia te oe i le taimi lenei ua e aulia o le olaga?
3. E fa'amaonia ea lenei manatu e tusa o le ala ma le tulaga o i ai tamaiti ma tupulaga talavou i le Ekalesia, aiga ma nu'u, ma sosaite? (Manatu fa'avae)
4. E fa'apefea ona suia o tatou lagona ma mafaufauga ina ua tataou tagata matutua? O a mea ua tatou maua mai ai, a'o a foi mea ua tatou misia? (Manatu fa'avae)

## FA'ATINOGA O LE MATAUPU:

1. O Tusi Faitau e pei ona ta'ua i luga, ia tufatufa ma vaevae vaega ma faitau ia malamalama. Ia galulue fa'atasi e fa'asoa ma lisi i lalo fa'afitauli, ma nisi fe'ese'ese'iga na feagai ma Iesu i lona aiga, o ona so'o ma ta'ita'i o le lotu.

**(a). O le fea feese'ese'iga e foliga tutusa pe felata'ai foi ma faafitauli o lo'o tataou feagai ai nei?**

**(e). I lo tatou iloa po o le malamalama i a'oa'oga a Iesu, e fa'apefea la ona tatou tali atu?**

2. Ia taumafai e manatua, ma fa'amauiina ni mea taua atoa foi ma ni mea faigata sa feagai ma le tagata lava ia.
3. Ia manatua foi i latou sa maua ai se fesoasoani mo oe i ia fa'afitauli po'o vaega taua o lou olaga.
4. Ia talanoa ma fetufa'ai taito'alua e uiga i ni a'oa'oga ta'ua na maua mai le tuana'i, a'o faimalaga mai ai i le laiti seia o'o mai i le avea ma talavou, ma aga'i atu ai pea i le avea ma tagata matutua.

## FAITAU MA SU'ESU'E FA'ATASI - IOANE - 12: 23 - 33

O nisi taimi, e tauivi ma mafaufau loloto Iesu i le ala na te faia pe ui ai. Peita'i, o le liliu atu ina ia usita'i ma faia le finagalo o lona Tama po'o auala e ui ai e fa'atonuina e lona Tama (auala fa'ale Atua), pe tau ai i le oti, o se mea faigata tele lea, ma le le faigofie ia Iesu.

## LU'ITAU MO LE SU'ESU'EGA FA'ATASI:

1. Mafaufau loloto i ni vaega o le olaga, taito'atasi po'o le Ekalesia foi, mafutaga Aualavou ma Aoga Aso Sa e o'o lava i tapuaiga, ma mafutaga i aiga, o lo'o fa'aosoosoina ai tele tupulaga talavou e fa'ama'amulu ma fa'avaivai ai e o ese mai ai.
2. Afai ua tatou malamalama i a'oa'oga a Iesu, e fa'apefea ona e tali atu ma ou tali atu i ia fa'aosoosoga, ma fa'atupuina le fiafia e ta'ita'iina ma malaga fa'atasi ma le Alii Toetu i lo tatou olaga o aso nei?
3. A'o le a sau va'ai mamao i le lumana'i, e manuia le malaga e ta'ita'iina e Iesu, pe sili atu lava le malaga o le tagata lava ia i le faigofie o le lalolagi ua i ai nei?

## UPU FA'AI'U

E pei lava ona soso atu, o le fa'amoemoe o le mataupu ia iloa e tupulaga ona fa'afeso'ota'i le olaga mai le tamaitiiti seia o'o ina avea ma talavou, fa'atatau i le soifua o Iesu, ma le olaga ua tatou o'o i ai i nei aso. O le mea lea e le o se finauga, a'o le fa'aaliga o manatu ina ia ta'ape le fuamalusina ua tofu si gogo ma si ana i'a, e fatufatua'i ai le soifua fa'aleagaga o tupulaga. O le tatalo foi lea ia outou Susuga ina ia salani le fetufa'aiga o le afiafi i ni saunoaga tima'i ma apoapoa'i mo tupulaga, ina ia mamafi ma ususita'i i ala ua fa'asino mai e le Alii Toetu tatou te manumalo fa'atasi ai.

Saunia e le Peresetene o le Aualavou se tatalo e fa'ai u ai le aoga i lenei afiafi. Malo le saili, fa'afetai le lava papale.

**Fa'afetai le fa'asoa. Manuia le savalaiga ma le Alii.**

\*\*\*\*\*

**ASO SA - APERILA 30, 2023. "FESILI MA TALII"  
MATAUPU – "IA FIAFIA E FAITAU LAU TUSI PAIA"  
TUSI FAITAU – IOANE : 20 & 21**

**SINI** – la fa'amanatu ma fa'atumauiina pea le taumafaiga ina ia fiafia le tupulaga e faitau ma su'esu'e le Tusi Paia i o latou taimi avanoa, ina ia iloa atili ai tala o le Tusi Paia.

**O FESILI E MAI LE IOANE MATAUPU E 20 MA LE 21.**

1. O ai le ulua'i molimau o le tu'ugamau tu'ufua i le tala a Ioane? (20: 1)
2. O ai na ulua'i ulu i le tu'ugamau na fa'amaonia atoatoa ai ua le o i ai Iesu? (20: 6)
3. O ai na ulua'i va'ai ia Iesu ina ua toetu mai nai e ua oti? (20: 16)
4. O le a le fetalaiga a Iesu ina ua oso atu Maria e fia feiloa'i ma ia? (20: 17)
5. O le a le fetalaiga sautualua a Iesu i ona so'o i le afeafe sa nonofo ai? (20: 19 – 21)
6. O ai le so'o e le'i i ai i le taimi na afio atu ai Iesu i le afeafe? (20: 24)
7. O le a le ta'utinoga a Toma ina ua vala'au fa'apitoa Iesu ia te ia, i le taimi lona lua na afio atu ai i le afeafe sa potopoto ai le 'au so'o? (20: 28)
8. O le a le fa'amoemoe o le tusitala na mafua ai ona tusia na o ia mea, ae le tusia uma fa'aילוaga na faia e Iesu? (20: 30 – 31)
9. Se tagata fea Natanielu? (21: 2)
10. O le a le i'uga o le faiva o Peteru ma isi so'o?(21:5)
11. E fia 'ia na maua ina ua fetalai Iesu e lafo le 'upega i le itu i matau? (21:11)
12. O le fa'afia lea ona fa'aali Iesu i ona so'o a'o fa'atasi? (21: 14)
13. O le a le fesili sautuatuolu a Iesu ia Peteru? (21: 15 – 17)
14. O a poloa'iga e tolu a Iesu ia Peteru?( 21: 15 – 17.
15. O le a le fesili a Peteru ia Iesu ina ua iloa atu e ia o Ioane o savali mai? (21; 21)
16. O le a le tali a Iesu i lena fesili a Peteru? (21: 22)
17. O le a le tala sesē na salalau e uiga ia Ioane? (21: 21 : 23)
18. O le a le taofi o Ioane pe afai na te tusia uma mea na faia e Iesu? (21: 25)

**FA'ATINOGA O LE MATAUPU -**

1. la vaevae le Autalavou i vaega e lua, ona fa'asolo foi lea e pei ona masani ai le taliina o fesili.
2. la toe tu'u se 10minute mo 'au e lua e toe taga'i ai i mataupu e pei ona fa'aaogaina.
3. Manatua e le fa'aaogaina le Tusi Paia i le taimi o le ta'alogā, auā ua atoa le vaiaso o tu'uina i ai e faitau mai le fale.
4. la tali mai i le mataupu, o le fuaiupu ma upu o lo'o i le tusi faitau.
5. Vaganā lava ua le maua lava le tali ona fesoasoani lea o lau Susuga, e fa'amanatu ia i latou.



6. Tautuanā e mana'omia lava upu o lo'o i le fuaiupu , ina ia sa'o ma lē toe galo i tupulaga.
7. E lelei tele le vaeluaina i tama ma teine, e iloa ai le itupa o lo'o fa'amaoni e faitau le Tusi Pa'ia i le vaiaso.
8. E lē fa'atagaina le tali to'atele i se fesili.

Saunia ni nai pesepesega e fa'ai'u ai le ta'alogā, ma fa'ai'u i se tatalo e le teutupe o le Autalavou.

**Malo le ta'a'alo, fa'afetai le faitau Tusi Paia.**

\*\*\*\*\*

**ASO SA – ME 07, 2023 – “SU'ESUE'GA I LE TUSI PA'IA”**

**MATAUPU – “UA NA O LE TA'ITA'IGA A LE ATUA E SAOGALEMŪ AI TUPULAGA”**

**TUSI FAITAU – ESOTO - 15: 11 - 19**

**SINI** – Ia a'oa'oina pea tupulaga i a'oa'oga a le Tusi Paia, ina ia talitonuina pea le fa'amaoni o le Atua i lana ta'ita'iga, e saogalemū ai lo latou ola ma le soifua o tagata fa'atuatua uma i le olaga nei.”

**FA'ATOMUAGA** – O le upu Esoto o lona uiga, “*o le o 'ese*”. O tala o lo o fa'amatalaina ai le *o 'ese* mai o le fanauga a Isaraelu mai le nu'u o Aikupito sa nofo pologa ai, ma ta'ita'iina ai ele Atua i le tele o tausaga e pei ona iloa i le malaga umi i le toafa (40 tausaga), se'ia o'o lava i le tu'uina ifo i ai o tulafono e savavali ma ta'ita'ina i latou i le mauga o Sinai.

O le vaega ua fia tuliloaina i le lenei mataupu, ua tatou fia sa'ilili i le vaega lea o le pese fa'afetai a Isaraelu ona o le vavega na faia e le Atua i le sami 'ula'ula ma le saogalemū ai o le nu'u. O le vavega o lo'o manino mai ai le fe'au lea o le ta'ita'iga saogalemū a le Atua, na sao ai le nu'u o Isaraelu i le tasi itu, ae lafoia ai Farao ma ana 'au i le 'alilitai o le sami. O le isi lea fa'amaoniga o le manatu ua fia tuli loa e lenei su'esue'ega, o le fa'amautuina lea i tupulaga o le mau fa'amaoni, ua na o le ta'ita'iga lava a le Atua, e saogalemū ai le folauga ma malutia ai le ola o tupulaga ma tagatau ma mai faigatā o le olaga o lo'o tatou i ai.

**FA'ATINOGA O LE MATAUPU. - O fesili e felafolafoa'i ai.**

1. E fautuaina pea le faitau o le tala ina ia sosolo lelei ai le talanoaga.
2. Ia faitau i fofoga (mata) e aunoa ma se leo ma manatunatu loloto i le tala o faitauina.

**FESILI –**

1. O le ā sou taofi, ua manatu fa'apito ea le Atua, ina ua ia fa'afanoia Aikupito i le sami 'ula'ula, ae fa'asao iā Isaraelu?
2. O le ā le mea na o'o i isi nu'u tuā'oi ina ua fa'alogā i lenei vavega ofoofogia? (ff: 14 – 16)
3. Ia fa'amaonia mai i lenei tala atoa ma nisi mea na tutupu muamua le loto ma'a'a tele o Farao?
4. *O le upu Esoto, o lona uiga o le o 'ese, o 'ese mai le mea sa pologa ai. O ā ni mea o lo'o fa'apologaina ai pea tupulaga talavou i aso nei e matuā tatau ona o 'ese mai ai?*

**O nai fesoasoani mo fesili o le felafolafoa'iga, ae fa'alautele pea e lau Susuga a le ta'ita'i.**

1. O le fesili muamua o lona tali sa'o lava o le **leai**, e lē fa'apea ua fa'apito le Atua iā Isaraelu ona o lona nu'u na filifili, ae o le fa'aalia lava lea o le fa'amaoni pea o le Atua i le feagaiga na osia ma Isaraelu, na te tausia ma lavea'iaina i latou . A'o le isi foi itu, e fa'amaoni lava foi le ta'ita'iga a le Atua, auā na te talia mana'o o e o lo'o vala'au atu iā te ia.
2. O le fesili e 2 ma le fesili e 3, e i ai le manatu ua silafia tali o ia fesili.

3. O le fesili lona 4, o le a’ano lea ma le ute o le a’oa’oga o lo’o fia momoli i le tupulaga. O le a’oa’oga tāua lea o le mataupu e pei ona talanoaina. O le fe’au mo tupulaga ina o ‘ese mai le mea o lo’o pologa ai i le olaga nei i le tiapolo. Aua le fefe e alu ‘ese mai le falepuipui o lo’o fa’apologaina ai e le tiapolo i tu’inanauga leaga o le olaga e fano ai, a ia lototele ma le fa’atuatua i le Atua e fa’amaoni lana ta’ita’iga i ala o le manuia ma le fa’asa’olotoina mai le leaga o le olaga. E tele naua falepuipui o le olaga ua fa’apologaina ai tupulaga ona o le tu’inanau i le va’aiga o mata, ma le faia pea o lona loto ae tia’i a’oa’oga a matua, o tausi ola a le Atua i le olaga nei.

### **O nisi nei o potu o le falepuipui a le tiapolo, ua matuā tatau ona o ‘ese mai ai tupulaga i le olaga nei**

1. Gaoi, kegi leaga fa’atupu vevesi, fa’amauululuga naua, manatu fa’apito, lokaina i le ‘ava malosi ma fuala’au fa’asāina, potu pogisā o le fiafia i le aisa, o le taufa’asesē, fasioti tagata, amio lē pulea, ola fa’atautala i fanau teine, ma le ‘ano’anoai o isi potu o le olaga pologa iā satani o lo’o fa’apologaina ai tupulaga ua lē sa’oloto, ua tatau ona o ‘ese mai ai. O le upu moni, e tele naua potu o le falepuipui a le tiapolo, o lo’o tatou pologa ai. E tatau iā i tatou uma aemaise o tupulaga, ona o ‘ese mai ai, ae o i le Atua auā o lana ta’ita’iga tatou te sao ai ma saogalemū ai le malaga i le olaga nei pei o Isaraelu, ma tau atu i lona malologa i le manuia e fa’avavau.

### **O le ā ta’oto atu i se fa’amalosi ‘au a lau Susuga a le ta’ita’i, e fa’ama’ea ai le felafolafoaiga.**

## **ASO SA – ME 14, 2023– “FA’ATALATALANOAGA” (Aso Sa o Tinā)**

### **MATAUPU – “O TEPORA LE FA’AMASINO FAFINE”**

#### **TUSI FAITAU – FA’AMASINO – 4: 4 – 24.**

**SINI** – E tuliloaina le a’oa’oga tāua o le mataupu ina ia iloa ma malamalama le Autalavou i le sao tāua o Tepora le Perofeta fafine, ina ua avea ma fa’amasino, ma le isi foi tinā o lāeli”

**FA’ATOMUAGA** – O le tula’i mai o lāpino e fai ma tupu o Kanana, o se taimi faigatā tele lea mo le fanauga a Isaraelu, auā sa malosi tele le itu tau a lāpino ma ana kariota u’amea e 900, sa pulea e lana ta’ita’i ‘au o Sesera. A’o le vaitaimi tonu foi lea o le tula’i mai o Tepora e avea ma fa’amasino iā Isaraelu. Ina ua va’ai atu ma le alofa Tepora i le oti ma le tigāina o lona nu’u, na ia a’ami ai lea iā Parako le atalii o Apinoamo, e omai ma tagata e to’a 10, 000, o le fanauga a Nafatali, ma le fanauga a Sepulona, latou te si’i taua iā lāpino ma Sesera ma le latou itu taua i le alia o Kisona.

### **O LE TALI A PARAKO IĀ TEPORA MA LE GALUEGA FA’ALOTOTELE A TEPORA–**

“Afai ta te o ma a’u, ona ou alu lea, ae afai ta te lē o ma a’u, ou te lē alu” Peita’i, o le galuega fa’aloto tele ma le fa’amalosi iā Parako ma le to’a sefulu afe, na ala ai ona latou o ifo mai le mauga o Tabora, ma latou tau ai le taua ma Sesera ma lana itu taua i le alia o Kisona. Sa fa’ata’ape’apeina e le Alii o Sesera ma lana itu taua uma i le pelu i luma o Parako, a’o Sesera ua sola o ia i ona vae i le fale’ie o lāeli, le avā a Kaveru o le sā Kenī. Ona fa’alafi lea e lāeli o Sesera i le ‘ie ‘afu i totonu o lona fale’ie, ma na fa’ainu foi iā te ia, ina ua ia galala i le fia inu. Ae ina ua moe gase Sesera i totonu o le fale’ie, ona alu ane lemū lea o le fafine o lāeli ma tutu’i ai le fao i lona manifinifi, ua ati ifo i le ‘ele’ele, ma ua oti ai Sesera. Sa tuliloa lava e Parako Sesera, ae ina ua o’o atu i le fale’ie o lāeli, sa fa’afetaia’i o ia e lāeli ma na fa’aalia iā Parako mea uma ua na faia. Ina ua va’ai atu Parako ua ta’atia Sesera ua oti, ua i ai foi le fao i lona manifinifi.

### **O TEPORA LE FA’AMASINO –**

E tusa ai ma le tala fa'asolopito o Isaraelu, o ulua'i fa'amasino – o ulu o aiga ma toea'iina o itu aiga o le nu'u. Sa pulea e i latou mea uma i le lotoifale o le aiga, ma o i latou foi sa faia fa'ai'uga o ni mataupu ma ni mea e tutupu mai. Ina ua ma'ea le Esoto mai Aikupito, sa fautua le toea'ina o letero ia Mose, e filifili mai le nu'u atoa ni tagata o loto tetele, o e matata'u i le Atua, o le tagata fa'amaoni, ma e 'ino'inoi i le manumanu, ma ia e tofia i latou e pule ia i latou. Sa taliaina e Mose le fautuaga a le tamā o lana avā, ma o lenā sa fa'ata'oto mai ai se fa'avae mautū mo Isaraelu ma ona ta'ita'i, aemaise i le tofi o le fa'amasino. Ina ua sopoia e Isaraelu le loritana ma ua latou nofoia le nu'u folafolaina o Kanana, sa fa'aauau ai lava lenei faiga o ta'ita'i ma fa'amasino, latou te pulea le nu'u.

Ina ua mavae atu losua, o lē na ta'ita'ia Isaraelu, se'ia o'o ina ua tula'i mai Saulo e avea ma ulua'i tupu o Isaraelu, o i latou uma sa avea ma ta'ita'i iloaga o Isaraelu, o fa'amasino. O le maliu o le fa'amasino o Euta, ona tula'i mai lea o le fa'amasino o Tepora, o le perofeta fafine, o le avā a Lapitōa, e avea ma fa'amasino ia Isaraelu. E tulaga 'ese lava foi Tepora mai isi fa'amasino o le nu'u, auā ua na o ia lava le fafine o lo'o ta'ua e le Tusi Paia sa pale i lenei tofiga – o le fa'amasino ia Isaraelu. E ui lava foi e lē o tele se tala e uiga ia Tepora ma lona gafa, ae o lo'o atagia manino mai i le vaega o le tusi faitau, o Tepora o se fafine e toa le loto, o se fafine finau i mea lelei, e lē solomuli gofie i fa'ai'uga tāua mo le manuia o Isaraelu ma ona tagata, e sa'ili malō i lona fa'atuatua mautū i le Atua e manumalō ai, e mata'u i le Atua e maua ai lona lototele, o le fafine ua tofia lava e le Atua e pulea Isaraelu i le tofi o le fa'amasino. O Tepora sa ia valo'ia le i'uga o Sesera, o le ā lē oti i luga o le malae o taua, ae o le ā oti i le lima o le fafine, o lāeli lea. Ae lē gata i lea, o le Fa'amasino – 5: 1 – 31, ua ta'ua lea o le Pese a Tepora ma Parako na fai ai le vii o le Atua. Ma o lenei pese, e lē gata o lo'o lagiina ai le manumalo o Tepora ma Parako ia Sesera ma lāpino ma a latou 'au, ae o le pese fa'afetai lenei mai le loto o Tepora, ina ia toe fa'afoi atu le vi'iga i le Atua, ina ua a'e manumalo Isaraelu mai ona fili.

#### **UIGA O UPU O I LE TALA –**

1. **FA'AMASINO** – O Fa'amasino, o tagata loto tetele, o tagata finau ma tauivi mo se lumana'i manuia o le nu'u, ae lē gata i lea, o tagata sa matatau ma ava tele i le Atua ma le tulafono. O fa'amasino foi sa avea ma lavea'i ma fa'aolataga mo le nu'u, auā sa galueaina i latou ma fa'agae'etia o latou loto e le Agaga o le Atua.
2. **Manifinifi** – o le itu o le alafau, ua iloa uma ai po'o ona foliga foi. A'o le upu fa'aperetania o lo'o fa'aaogāina ai e le Tusi Pa'ia, o le **temples**, o le vaega o le ulu o lo'o i tua tonu lava o mata. (temples are located just behind the eye-sockets)

#### **VA'AIGA FA'A – KERISIANO –**

- a. **E fa'aaogāina e le Atua so'o se tagata e fa'ataunu'uina ai lona finagalo pa'ia.**

A tatou mafaufau i tu ma aga i fanua fa'a –Isaraelu, e tele lava ina va'ai maulalo ma lē amana'ia e le lutaia le tulaga o fafine, tinā ma tamaita'i i totonu o lo latou sosaiete. O se fa'ata'ita'iga, o le va'aiga a le tamāloa i lona to'alua i na ona po, ua peiseai o sana lava meatotino(tulou), e faitauina fa'atai ma lana fanau, ma e pule lava o ia i le fafine.

A'o le ā se va'aiga i le mataupu o lenei Aso Sa o tinā, O Tepora, o le perofeta fafine, o le avā a Lapitōa, pe maulalo ma vaivai i le va'aiga a le lutaia, ae ua fa'aaogāina lava e le Atua e fai ma Fa'amasino, e pule ma ta'ita'i ia Isaraelu, ma o Tepora na ala ai ona a'e manumalo Isaraelu ia Kanana. A'o lāeli foi le fafine i le tasi itu o le tala, o le fafine e lē iloa sona tulaga, e fa'atauva'a ma maulalo i le va'ai a le lutaia, peita'i o lona lava lima na o'o ai le oti ia Sesera le ta'ita'i 'au a Kanana. E peiseai ua tu'u fa'afeagai e le Atua le toa sauā ma le malosi o Kanana o Sesera, ma lenei fafine maulalo ma le lē iloaga, ma ua manumalo ai.

- e. **E mana'onia e le Atua ni ta'ita'i fa'amaoni e avea ma fa'amasino i totonu o aiga, a'oga, nu'u ma Ekalesia.**

Ua fa'ata'oto mai i lenei tala iā Tepora le fafine lototele, ni a'oa'oga e fai pea ma va'aiga e tulimataina ma mulimuli i ai, so'o se tasi e fia ave ma ta'ita'i manumalo

1. O le fa'atuatua ma le mata'u i le Atua.
2. O le fa'amoemoe ma le fa'alagolago i le musumusuga a le Agaga o le Atua.
3. O le loto tele, fa'amaoni, ola usiusita'i, sa'ili malo manumalo.
4. E tutū fa'atasi ma ona tagata ina ia mafai ai pea ona fa'alaei 'au ma fa'amalosi 'au iā i latou e tauivi ma finau pea, e ui lava o lo'o fetaia'i ma tigā ma faigatā o le olaga.
5. Ia atagi mai i lana amio, i lana gagana, i ona foliga ma lona olaga atoatoa, foliga pa'ia o le Atua.
6. Ia iloa fa'afo'i le vi'iga o le Atua i le Atua.

### **A'OA'OGA TĀUA:**

Mo lenei Aso Sa o tinā, ua a'oa'o mai le tala iā Tepora ina ia tatou manatuaina ai pea le alofa fa'atinā o le Atua, fa'atasi ma le alofa fa'ale- Atua o tinā. O le tala iā Tepora, o le tinā ua fa'apaleina e le Atua i mamalu ma maualuga o le Fa'amasino iā Isaraelu, ina ia avea ma Fa'aola i ona tagata – o le ata manino foi lenā o le fa'aaogāina e le Atua o le soifua ma le malosi o Tinā i totonu o Aiga, nu'u, atunu'u ma le Ekalesia.

### **Fesili fa'atupu manatu, fa'alautele ai le mataupu –**

1. O le taofi o le tatou atunu'u , e au le inailau a tinā, e i ai se feso'ota'iga o lenei fuaitau a le atunu'u ma le tala iā Tepora? Fa'aali sou taofi.
2. Ua saosaoa tele le sauāina o tinā po'o fafine i totonu o aiga ma nu'u, o le ā sou manatu, ua lē lava ea le Tusi Paia e fa'atonu ma a'oa'o, a'o'ai ai tamāloa o faia ia faiga sauā? Ae a le falepuipui?

### **Manuia tele Aso Sa o tinā, alofa tele atu.**

\*\*\*\*\*

### **ASO SA - ME 21, 2023 – “AGANU'U”**

#### **MATAUPU – “O LE MAVAEGA I LE TAI”**

**UPU TOMUA** – O le fa'amoemoe mo lenei mataupu o le aganu'u, o le taumafai pea ia malamalama tupulaga i tala ma uiga o upu po'o alagā-upu ua mafai ona maua i nai sa'ili'iliga. O le mea lava ia manatua ma taofi pea, e taofi 'ese'ese uma le atunuu ma ā latou mau, peita'i, o le ā lē afāina lea i le manatu, a'o le manulauti ua fia fa'atāua pea, o le a'oa'oga ia mafai ona a'oa'oina ai tupulaga talavou. E lē o fa'atinoina foi nei mataupu i ni finauga po'o ai e tonu ma sa'o, auā e talalasi le atunu'u, e fa'amalūlū ai ina ne'i a'afia se lagona, o manatu lava ua maua mai i sa'ili'iliga, ua talafeagai lelei ma a'oa'oga o lo'o fia tu'uina atu i tupulaga. O le fa'amoemoe tāua lava, o le talanoina o mavaega, ua taumafai ai e fa'afaigofie, ina ia tuliloaina ai le a'oa'oga mo tupulaga, pe ā o'o ina feso'ota'i i le Tusi Paia. E lē gata la e toe fafagu mai tala ma fa'amanatu mai mavaega mai anamua, ae ua tatou maua mai i tala ia ma upu a le atunu'u, feso'ota'iga ma a'oa'oga tāua ma aogā i tupulaga, o lo'o molimauina le Tusi Paia.

#### **MVAEGA -**

E pei ona sōsō atu, e talitonu lava le taofi i le mau 'ese'ese o le atunu'u, i le uiga o le fesili, o le ā le mavaega? Atonu e tofu lava le tagata ia ma lana tali. A'o nai manatu ua fia fa'aalia e avea ma fesoasoani i lenei mataupu e fa'apea –

1. O le mavaega, o le mea aupito i tāua e fa'amanatu ai mea sa tutupu i le olaga i Samoa. O se fa'amanuia e māvae ai ni tagata, ina ia aua nei galo.

2. O le mavaega, o le mana’oga mulimuli lea a se mātua i se fanau ma lona aiga, ua tu’uina atu ma le fa’amoemoe, o le ā fa’ataunuina pe ā mavae atu o ia.
3. O le mavaega, o le uputu’u a le atunu’u mai lea tupulaga i lea tupulaga, ina ia auanei fa’agaloina.
4. O le mavaega, o se aia’iga tau māvae a ni tagta ina ia latou tausii ma savavali ai.
5. O le mavaega, o se feagaiga ua osia i le va o tagata, po’o ni tagata ina ia latou tausii ina ia aua nei galo, auā a tete’a ‘ese, e avea le mavaega e fai ma fa’amanatu i le feagaiga na osia.
6. O le mavaega o folafolaga ma maliliega, ia mafai ona tausii e itu uma e lua pe sili atu foi, ina ia mafai ona tau’aveina pea i le gasologa o le olaga, ia aua nei galo.

Mo le mataupu o lenei afiafi, ua fia aumai se mavaega mai le aganu’u, ma se mavaega mai le Tusi Pa’ia, e fetufa’a’i ma fefa’asoa’i ai le Autalavou, ina ia fa’alauteleina ai le silafia i le tāua o mavaega, i le olaga o le Samoa, a ia a’oa’oina ai foi le tama ma le teine talavou i mavaega o le Tusi Paia, ia uigā ma ‘anoa i lo latou olaga o aso uma.

### **O LE MAVAEAGA I LE TAI.**

O le mavega lauiloa lenei na mafua mai le masaga teine o Taema ma Tilafaiga. Ma o le mavaega lea ua ta’ua o le mavaega i le tai.

**O LE TALA** – o Taemā ma Tilafaigā, o le fanau a Sinalaloofutu ma le tamā iā Ulufanuasese’e. O se masaga e fanau mai e pipi’i o la patua. Sa latou nonofo i se tolotolo i gatai o Falelatai e igoa o Fagaiofu. Na a’ave tala o le lalelei o lenei ‘au uso, ma o lea na alu ai loa se taule’ale’a, e fia va’ai i ai pe fa’amaonia le lalelei o ia tamaita’i. Ua alu le taule’ale’a ma amo se oga fafie lapoa lava, e taunu’u atu la le taule’ale’a, o lo’o fa’asavili lava le masaga i luga o le papa. O le te’i o le va’ai a le taule’ale’a i le lalelei o teine, na ia fa’apalasi fa’afuase’i ai le ogā fafie i lalo ma lona sioā tele. O le palasi lea o le ogā fafie na gālulu uma ai lenā ogā ‘ele’ele atoa.

Na matuā fa’ate’ia le masaga o Taemā ma Tilafaigā i le mea ua tupu, ona oso lava lea o le tagata ia i le itu o lo’o faasaga i ai, ma ua avea lea ma pogai o le matala o teine na pipi’i o la patua, ma ua atili ai ona fe’ausi ma fetagisi. Ua mamao lava i tai i le sami le la ‘ausaga, ona fa’apea loa lea o ā la upu, **A oo i se aso ae feūa’i o ta tua, ia tumau pea lo ta fealofani.** Ma o upu ia o le mavaega na faia i le tai a’o fe’ausi teine i le sami, ua mafua ai ona faaigoaina o **le mavaega i le tai.**

O upu o lenei mavaega, A o’o i se aso ae feūa’i o ta tua, ia tumau pea lo ta fealofani. Ua fa’alogaoina pea ma fa’a’ogāina e failauga o le atunu’u e fa’amavae ai, ina o le ā tula’i ma o ‘ese. O le ata manino la o le feūa’i o tua, ia manatua, e leai se tasi e alu solomuli. A o’o ina ā alu ‘ese se tagata po’o ni tagata, e ū mai tua ma savavali i le mea o le ā fa’asaga i ai e tatau ona alu aga’i i ai. Ma o lona alu ‘ese, e alu ma alofa’aga o e o lo’o nonofo pea. E lē o le feūa’i o tua o toa i le femisaa’i ma le fa’avevesi, e lē o le feūa’i o tua ina ua leai ni fesaga’iga e pei ua lē masani, a’o le feūa’i o tua o le ā o ‘ese, ma o le ā tete’a ma nonofo valavala. O lona uiga, e ū mai le tua, ae o lo’o alu ma alofa’aga o lē o lo’o nofo pe fa’amuli.

### **O LE MAVAEAGA A TAVITA MA IONATANA. (1 Samuelu – 20: 35 – 42)**

O le faigāuo a Tavita ma Ionatana, o se mafutaga mafanafana ma vāvālalata. O le faigāuo sa fusia i le alofa fa’amaoni ma le fealofani o le tasi i le tasi. E ui lava e leai so la faia pe ā tala le gafa, ae o le mafutaga a le uso tu ofe, e lē o se uso taufeagai. E peisea’i o ni tama masaga sa fananau mai i se manava e tasi. O le pi’itaga ua lē mafai ona tatalaina. A e ina ua taupulepule ma taulamalama le tupu o Saulo e fasioti iā Tavita, na osia ai loa le lā feagaiga fa’ale- uso, ina ia aua nei tu’ua foi lou alofa i lo’u aiga e fa’avavau. (1.Samuelu 20: 15). Ae na mautinoa e Ionatana le fa’amoemoe sa faufau leaga i ai lona tamā o Saulo, ina ia fasioti iā Tavita. O lea na ia fai ai loa le mavaega ma Tavita e fa’apea, “Alu ia ma le manuia, ia i ai le Alii ile va o oe ma a’u, i le va foi o lau fanau ma la’u fanau e fa’avavau”

O upu o lenei mavaega, alu ia ma'le manuia, ia i ai le Alii i le va o oe ma a'u. Ua masani foi ona tatou fa'alogo i ia upu – la tu le Alii i lo ta va, O le Alii e va a'i i tāua. O le agaga maualuaga lava o lenei mavaega, po'o fea lava e alu i ai le tagata, po'o le ā le mamao e va a'i mal e isi, pe va i le 'ele'ele, pe va i le sami, E tumau lava le Atua i le va lea, O lona uiga o le Atua lava e fa'atumauiina le va lenā. Alu ia ma le manuia, ia i ai le Atua i le va o oe ma a'u, i le va foi o lau fanau ma la'u fanau e fa'avavau. O le mavaega ua a'afia ai ma tupulaga o le lumana'i.

#### **UPU FA'AI'U – O LE MAVAEAGA A IESU MO I TATOU.**

O le upu moni, e tele nauā ma lasi a'oa'oga, fa'ata'ita'iga, ma mavaega alesu ua tu'uina mai mo i tatou o tagata Kerisiano, e aofia ai ma tatou o tupulaga. O mea uma ia ua fai ma ta'iala ma tapasā, ma alāfua e fa'avaeina ai le ola o le Kerisiano aemaise le tama ma le teine talavou manumalo. A'o le mavaega a Iesu ua fia fa'amamafaina e lenei mataupu, lea o lo'o molimau i ai le evagalia a Mataio – ***O lenei ia outou o atu e fai nu'u uma lava ma so'o, ma papatiso atu iā te i latou i le suafa o le Tamā, ma le Atalii ma le Agaga Paia, ia outou a'oa'o atu iā te i latou ia tausī i mea uma ua ou fai atu ai iā te outou, fa'auta foi, ou te iā te outou i aso uma lava, e o'o lava i le gata'aga o le lalolagi. (Mataio – 28: 19 – 20).*** O lenei mavaega, ia fai ma uputu'u iā i tatou, ina ia tatou fa'aauau mai lea tupulaga i lea tupulaga, O lenei mavaega, o le feagaiga ua osia i le va o le Keriso manumalo ma le Kerisiano fa'atuatua fa'amaoni. I le ma lea, o lenei mavaega, o le folafolaga ma le fetalaiga a le Keriso manumalo, ina ia mafai ona tatou tausī, ma ia tatou tau'aveina pea i le gasologa o lo tatou olaga, ina ia aua ne'i galo iā i tatou lo tatou vala'auina.

**FA'AUMAINA O LE MATAUPU** - O le faiga masani lava o fetufa'iga, e ta'oto atu lava i lau Susuga a le ta'ita'i le fa'asologa. Ae fa'ai'u lava i se saunoaga a le Susuga i le fa'afeagaiga, e fa'amamafa ai le aogā pea ona malamalama le tupulaga i mavaega a le atunu'u, ma ia sili atu ai le taofi mau i mavaega a le Keriso Toetu.

#### **Manuia le Aso Sa, malo le onosa'i.**

\*\*\*\*\*

#### **ASO SA – ME 28, 2023 – “SU'ESU'EGA I LE TUSI PAIA” (Aso Sa Penetekoso)**

#### **MATAUPU - “OLA I LE FA'AOLATAGA I LE AGAGA PAIA”**

#### **TUSI FAITAU - ROMA - 8: 1 - 17**

**SINI** - la a'oa'o ina atu i tupulaga, ina ia malamalama lelei, o le ola i le Fa'aolataga, o le ola lava lea i lalo o le ta'ita'iina a le Agaga Paia”

**“Aua o i latou uma ua ta'ita'iina e le Agaga o le Alii, o atalii i latou o le Atua.”**

#### **FESOASOANI MO LE MATAUPU -**

**O le tala:** O le vaega lenei o le mataupu e 8 o le tusi a le Aposetolo i le Ekalesia i Roma, o lo'o tautala ai le Aposetolo i le 'ese'ese o le tagata e ola i la le tino ma le tagata e ola i la le agaga. Ua ta'utino e le Apostolo, e le fa'aolaina se tasi i la le tino, e ui ina o lo'o tatou ola i le lalolagi. Ae afai e suia lo tatou ola i le ola i la le Agaga, ona fa'aolaina lea o i tatou. O le ola i le tino, ua fa'atusaina i le ola agasala, o le ola lava lea i amio a le tino e oti ai. O le lalolagi o agasala o lo'o fesou'ina ai le tagata i faigata ma fa'aosoosoga a le tiapolo. Peita'i, afai e fasiotia lea olaga agasala i le ola i lalo o le ta'ita'iga a le Agaga Pa'ia, ona maua lea o fa'amanuiaga, o le avea foi lea ma fanau po o atalii ma afafine o le Atua.

O le ola i le Fa'aolataga, o le ola manumalo lava lea mai le ola i le tino, ae ola i le Agaga. O le ola foi i le ta'ita'iga a le Agaga, o le auai lava lea fa'atasi ma Keriso i le 'au aiga o le Atua, e pei ona fa'amamafa mai le fuaiupu e 14. (*aua o i latou uma ua ta'ita'ina e le Agaga o le Atua, o atalii i latou o le Atua.*)

O le vaega foi lenei o le tusi ia Roma, e foliga o lo’o tali atu ai le Aposetolo i le mataupu e fa’atatau i le Ta’uamiotonuina o tagata i le fa’atuatua. O le fa’atuatua lea e avanoa uma ai tagata, (*po’o le lutaia, po’o le Eleni, tane po’o le fafine, pologa po’o le sa’oloto*), i lalo o le alofa tunoa o le Atua. O le ta’uamiotonuina lea i le fa’atuatua ia Iesu Keriso, i lona maliu ma lona toetu manumalo. O le ola i lea fa’atuatua, o le ola lava lea i le Agaga, atoa ma fa’amannuiaga o le ola i lalo o le ‘au aiga o le Atua, ma ta’ua ai o fanau a le Atua.

#### **NISI O UPU E FA’ASOA AI -**

1. **FA’AOLATAGA** - O le ogatotonugalemu lea o le galuega fa’aola na afio mai ai Iesu i le lalolagi. O le galuega lavea’i na saunia e Keriso, i luga o le satauro ina ia fa’aolaina tagata uma o e ua talitonu ma fa’atuatua fa’amaoni ia te ia.
2. **TA’UAMIOTONUINA I LE FA’ATUATUA** - O le tasi lenei o mataupu tau’ave pea a le Aposetolo o Paulo i lana tala’iga i nu’u ‘ese. E fai pea ma mau fa’amalosi a le Aposetolo e tete’e atu ai i talitonuga fa’a - lutaia.  
O le mau a lutaia, se’i vagana ua avea le tagata o nu’u ‘ese ma tagata lutaia e ala i le taliaina o tulafono ma aganu’u fa’a - lutaia, ona avea lea ma Kerisiano po’o tagata e aofia i le fa’aolataga a le Atua.  
O le manatu o Paulo, pau lava le auala e talia ai le fa’aolataga a le Atua, o le fa’atuatua o so’o se tasi i le maliu o Keriso ma lona toe soifua manumalo mai le oti ma le tu’ugamau, O le ta’uamio- tonuina o le avea ma atalii ma fanau a le Atua i la le fa’atuatua, ae le o galuega a le tulafono.

**FA’AI’UGA** - O le manatu autu o le mataupu i lenei Penetekoso, *o le ola i le Fa’aolataga i le Agaga Paia*. O se manatu ua aofia faatasi i le tino e tasi o le Tolu tasi Pa’ia. Le Tama, le Alo, ma le Agaga Paia. O lona uiga, tatou te le o ola i le ola faavasegaina fa’ale - tagata, e ui ina o lo’o tatou i ai i le tino i le lalolagi. Ae o lo’o tatou ola i le Agaga e ta’ita’ina i tatou ma iloa ai po o le mea sa’o po o le mea sese o lo’o fai. Ona pau lea o le auala e ola ai, ma o le ola ai i lenei auala, o le a avea ai i tatou ma sulii o le aiga o le Atua.

Ua avea i tatou ma fanau i le aiga matagofie o le Atua e ala i lona alofa tunoa, e talia ai i tatou uma, po’o fea lava tatou te i ai, po’o fea foi tatou te omai ai. O fa’amanuiaga e maua e sui uma o lenei aiga o le Atua, e le gata i le taimi nei, ae fa’apea foi i le lumana’i, ma e mausali ma puipuia e le Atua. O le mea lea, a o’o i taimi tatou fa’amanatu fa’atasi ai puapuaga o le Alii e ala i le Talisuaga a le Alii, e tataua ona tatou manatua o i tatou o uso ma tuafafine, ua mafuta i le fealofani ma fefa’amagaloai, aua ona o le alofa tunoa ua vala’auina ai i tatou ma avea o tatou fa’amoemoega ua na o le Atua lava, ae le o mana’oga o le tino ma ona tu’inauga.

#### **FA’ATINOGA O LE MATAUPU -**

1. Faitau ia manino le tusi faitau, e manaia ae felafolafoa’i lau Susuga ma le Autalavou.
2. Afai e i ai ni upu e fia fa’amalamalamaina , fa’amolemole fesoasoani atu i nai tupulaga.
3. Ia fetufa’ai i le mataupu e pei ona masani ai, ma fa’amalamalama pea le ‘autu o le mataupu’
4. O le faatinoga mulimuli o le fesiligia lea o le mafutaga i ni aoaoga ua latou maua mai i lenei mataupu.
5. Fa’ai’u loa lea i le tatalo e saunia e le Peresetene o le Autalavou

#### **Manuia tele le Aso Sa o le Penetekoso.**

\*\*\*\*\*

**ASO SA – IUNI 04, 2023. “FELAFOLAFOA’IGA MA FA’ATINOGA”  
MATAUPU – “FA’ATINOGA O TALA O LE TUSI PA’IA”**

**SINI - la fa'amasani tupulaga i le fa'atinoga o tala o le Tusi Paia, ma o le auala foi lea o le a manatua ai pea tala ia pe afai e fa'atinoia.**

**FA'ATOMUAGA** - O le mataupu ua manatua e fa'aaogaina ai le auala o fa'atinoga e le Autalavou. O tala ma mataupu ua tu'uina atu i lalo, o le a faia ai le fa'atinoga lea. O se manatu ina ia taumafai pea e 'apo le fiafia ma le iloa o tupulaga i le Tusi Pa'ia. E leai se fa'amoemoe e tau a'oa'oina ina ia sili ai i se tauvaga, leai, o le 'autu ia mafai e tupualaga ona fa'atino lava i le taimi, ina ia mautinoa ai ua manino ma malamalama i le tala. O le fa'amoemoe foi, ia le sasaluina ni aoga tala i se fia vaiaso, e le o le fai foi o se faiga faleaitu, ae faitau ia malamalama i le tala ona fa'atino lava lea i upu a le tagata lava ia, ia po'o le fa'aaoga foi o le gagana a le tusi faitau. Ia taumafai lava e fa'atino mai le uiga moni o le tala e pei ona i ai i le Tusi Faitau.

**FA'ATINOGA O LE MATAUPU -**

1. Ia vaevae le mafutaga i ni vaega e fua fa'atautu i tusi faitau ua tu'uina atu, ia tofua le vaega ma le tusi faitau.
2. E le afaina pe a le atoa vaega e fa, e fua i le aofa'i o le tou mafutaga, ona pule lea o lau Susuga i tusi faitau o le a fa'aaoga pe afai o le a i lalo ifo le aofa'i o vaega o lau Autalavou ma le 4.
3. Ia tu'uina atu ni minute e galulue ai i vaega e fa'atulaga a latou tala, ona toe fa'apotopoto lea ma amata loa fa'atinoga a vaega.
4. Ia tu'u pea le faitalia i le umi o le latou tapenaga, a ia tulimataina pea le a'ano o le tala o lo latou fa'atinoia.
5. Ia atagia i a latou fa'atinoga le fa'ama'ite a le agaga, na mafua ai la latou fa'atinoga, e pei o le taumafai ia maumauta'ia le tala ma ona va'aiga o lo'o i ai, i se taimi pu'upu'u na tapena ai.
6. Afai e atagia i le faatinoga o le tala, o le mea moni lena na tupu e pei ona i ai i le tusi faitau, ua maua la le sini o le taumafaiga.

**O TUSI FAITAU -**

- |                        |                           |
|------------------------|---------------------------|
| 1. KENESE - 3: 1 - 19  | 2. FA'AMASINO - 4: 4 - 24 |
| 3. NE'EMIA - 6: 1 - 19 | 4. MATAIO - 28: 1 - 10    |

**FA'AI'UGA** - Ou te taofi ua manino le fa'amoemoe o lena mataupu, ina ia fa'amasani atili ai tupulaga i tapenaga o tala o le Tusi Paia i se taimi pu'upu'u e aunoa ma le fia vaiaso o tau a'oa'o. Fa'amolemole o le a fa'ai'u pea i se saunoaga a lau Susuga a le Fa'afeagaiga e fa'amalosia ai lena fa'amoemoe. Ma fa'amanatu pea i tupulaga ia avea pea le Tusi Paia ma tusi e fa'amamua i lo latou fiafia.

Saunia ni pesepesega e pepese fa'atasi ai mo le fa'ai'uga o le mataupu, ona fa'ai'u loa lea i le tatalo e saunia e se alii o le Autalavou.

**Manuia tele le mafutaga i lena afiafi**

\*\*\*\*\*

**ASO SA - IUNI 11, 2023. "SU'ESU'EGA I LE TUSI PAIA"**

**MATAUPU - "O LOU MANATUA O LE TUSI PAIA"**

**FA'ATOMUAGA** – Ua manatu lava e fai ma vavae foe o le gasologa o tatou mafutaga i lea afiafi ma lea afiafi. Tasi le mea ia manatua fa'amolemole, o lo'o fa'aaogaina pea le Tusi Paia, e ta'iala i le vavaeina o foe. O le fa'amoemoe lava ia mamafi le ola o tupulaga i le fa'ataua o le iloa o le Tusi Paia, ina ne'i fesiligia i se aso, ae atonu lava na tau ane ai sa tatou taumafaiga. O le mataupu la o le



afiafi nei, o le taliina o nisi o fesili faigofie ua tatau ona le galo i tupulaga, na fa'alogo lava i ai o laiti. Ae o le a toe fa'amanatu, tatou te iloa ai le tulaga o le manatuaina pea, ia pe ua galo nimo lava foi.

### FA'ATINOGA O LE MATAUPU.

1. E le fa'aaogaina le Tusi Paia, e leai foi se taimi e tu'uina i le mafutaga e su'esu'e ai.
2. E amata sa'o lava i fesili ma tali, e saunoa pea lau Susuga a le ta'ita'i i fesili, ae tali ane le Autalavou.
3. E lelei foi ae fai 'au, e finau ai ma galulue fa'atasi ai e sa'ili le tali sa'o o le fesili.
4. Ia manatua, ia fa'amaumauina pe fia ni fesili o le a mafai ona taliina e le Autalavou, ona fua lea i ai o se fesososani mulimuli ane.
5. E lau e le ta'ita'i fesili ae auaua'i ta'ito'atasi sui o 'au e tali i le fesili.
6. Ia fuaufua lelei e le ta'ita'i le tofiaina o sui e tali fesili, ia fesuisuia'i, ae aua le fa'aloloto le isi sui.
7. E mafai ona fa'aopoopo nisi fesili pe a fai e talafeagai ai.

### FESILI –

1. O a feagaiga ua vaevaeina i ai le Tusi Paia? **Tali** – *O le Feagaiga Tuai ma le Fegaiga Fou.*
1. O le uiga o le upu Penetatiuka, o tusi e lima o le Tusi Paia. O a igoa o ia tusi e lima? A'o ai foi e ana ia tusi? **Tali** – *Kenese, Esoto, Levitiko, Numera, Teuteronome. O tusi e lima a Mose.*
2. O ai le tagata e ana upu nei, Fa'auta o le fa'alogo e sili lea i le taulaga, ma le usiusita'i e sili lea i le ga'o o le mamaoe po'a. **Tali** – *O le perofeta o Samuelu (1 Samuelu – 15: 22)*
3. Na musu Parako e alu na o ia e tau ma lapino le tupu o Kanana ma Sesera lana ta'ita'i 'au. Ua manao Parako la te o fa'atasi ma Tepora, ona fai ane lea o Tepora lenei valoaga ia te ia. Ta te le o lava ma oe, ae peita'i, e leai sou vi'iga i lenei mea e te alu ai oe, aua e tu'uina atu e le Alii o Sesera i le lima o le fafine. O ai le fafine lea na taunu'u i ai le valoaga a Tepora le perofetsa fafine? **Tali** – *o Iaeli le ava a Kaveru le sa Keni (Fa'amasino – 4: 17 – 21)*
4. O ai uo ta'ufa'asese e to'atolu a lopu? **Tali** – *O Elifasa, Pilitati ma Sofara*
5. O le lautusi e fia o Salamo o lo'o fa'amauiina ai sa'afiafiga o Isaraelu mo Ierusalem a'o aumau i latou i Papelonia? **Tali** – *O le lautusi o Salamo e 137.*
6. O a mea e tolu o lo'o taua i le Tusi Paia e le mao'ona lava i latou? **Tali** – *O le tu'ugamau, o le manava e le fanau, ma le 'ele'ele e le malie i vai. (Fa'ataoto 30:15e – 16)*
7. O gafea o le Tusi Pa'ia o lo'o fa'amauiina ai upu nei? "O lenei, ia e manatua le na faia oe i ona po o lou taule'ale'a, a o le'i o'o mai aso leaga, a'o le'i o'o mai foi tausaga e te fa'apea ai, e leai so'u fiafia i ai." **Tali**- *O le Failauga e 12: 1.*
8. O ai le perofeta e ana upu nei? Aue a'u nei, aua ai a'u a fano, aua o a'u o le tagata laugutu leaga, o a'u foi matou te mau fa'atasi ma le nu'u laugutu leaga, aua lava ua iloa e o'u mata le tupu o le alii o 'au. **Tali** – *O le perofeta o Isaia. (Isaia- 6: 5)*
9. E fia tusi o le Feagaiga Tuai. **Tali** – *E 39.*
10. O lo'o fa'amatalaina e Mataio le tala i le gafa o Iesu, amata mai ia Aperamo se'ia o'o mai ina ua fanau o ia. E fia le a'ofai o augatupulaga mai ia Aperamo se'ia o'o mai ia Iesu Keriso.? **Tali** – *E 42 (Mataio – 1: 17)*
11. O a lavalava ma mea'ai sa fa'aaogaina e lenei tagata o loane le papatiso? **Tali** – *O lavalava – fulufulu kamela ma le fusipau i lona sulugatiti. Mea'ai – O se akerise ma le meli vao. (Mataio e 3: 4)*
12. O le a le uluai' fa'amanuia a Iesu i luga o le mauga? **Tali** – *Amuia e matitiva i le agaga, aua e o latou le malo o le lagi.*
13. O ai foi le igoa o le tane muamua a Herotia, a'o lei toe nonofo i laua ma le tupu o Herota? **Tali** – *O Filipo le uso o Herota. (Mataio 14 – 3 – 5)*
14. O le a le poloa'iga sili na fetalai mai ai Iesu? **Tali** – *E te alofa atu i le Alii lou Atua ma lou loto atoa, ma lou agaga atoa ma lou manatu atoa. (Mataio – 22: 35 – 36)*

15. O ai le tagata o lo’o fa’atautau i ai le fetalaiga lea a Iesu? “E lelei i lea tagata pe ana le fanau mai.” **Tali** – *O luta le Sekara. (Mataio – 26: 24 – 25)*
16. O le ulua’i fa’ailoga na faia e Iesu o lo’o fa’amauiina e Ioane? **Tali** – *O le liliuina o le suavai e fai ma uaina i le tausama’aga i Kana i Kalilaia. (Ioane – 2: 7 – 11)*
17. O le a tonu lava le aso na foa’iina mai ai e Iesu le Agaga Paia i luga o ona so’o ma le ‘au fa’atuatua uma i Ierusalem? **Tali** – *O le aso Penetekoso. (Galuega - 2:1 – 4)*
18. O ai le so’o na fa’amaloloina le tagata saua lea o Paulo ina ua taia e le malamalama o Iesu Keriso? **Tali** – *O Anania. (Galuega 9: 3 – 16)*
19. E fia le aofa’i o Tusi o le Feagaiga Fou? **Tali** – *E 27.*

**Manuia tele le fetufa’aiga i lenei afiafi.**

\*\*\*\*\*

**ASO SA - IUNI 18, 2023 “SU’ESU’EGA I LE TUSI PAIA” (Aso Sa o Tama)**

**MATAUPU - “O LE TAIMI O FA’AIUGA TUMAU”**

**TUSI FAITAU - IOSUA - 24: 14 - 18**

**SINI - “Ia malamalama tupulaga ma a’oa’oina i latou i le taua o le faia o fa’ai’uga tumau mo o latou olaga, e pei o fa’ai’uga fa’atama a Iosua mo lona aiga, aemaise o Isaraelu.”**

**FA’ATOMUAGA** - O le igoa Iosua, lea sa sui tulaga ia Mose e fai ma ta’ita’i o Isaraelu, lea ua fa’aigoa ai lenei tusi o Iosua. O ia o le atalii o Nuno. (Iosua - 1: 1)

O mea taua o lo’o i lenei tusi, o le fa’atoilaloina o le tele o ituaiga sa ulua’i nonofo i Kanana atoa ma le vaevaeina o le lau’ele’ele i ituaiga e sefululua o Isaraelu.

Ua matua Iosua, ua lata ina oti, ae o lo’o femoumoua’i pea uiga o Isaraelu i le Atua. O le tele lava o taimi e o ‘ese ai ma ifo i atua ‘ese. O upu fa’amavae a Iosua, na ia tu’uina atu ai se lu’i mo Isaraelu uma. Ina ua uma atu ana upu fa’alaei-’au ma lapata’i, fa’amafanafana i tupulaga fou o le nu’u. O le lui lava a Iosua, Afai e leaga ia te outou ona auauna i le Alii, ina filifili ia o outou i le aso nei, po’o ai tou te auauna i ai, po’o atua na auauna i ai o outou tama, o e sa i le la itu o le vaitafe, po’o atua o sa Amori, e o latou le nu’u ua outou nonofo ai, a’o a’u nei ma lo’u aiga, matou te auauna i le Atua.

O le fa’amafanafana a le tama ua ia iloa fa’ai’uga tumau mo le manuia o le fanau, le aiga, nu’u ma tagata uma. Le tama e mamao lana silasila fa’ale- Atua i le lumana’i ma manuia o lo’o fa’atali mai. A’o le toe lapataiga ina ia sagatonu fa’ai’uga a le nu’u a’o le’i mavae atu o ia, o le tama fa’i fa’ai’uga tumau mo le fanau.

A’o le lu’i lea mo tupulaga, ina ia amata nei ona fai fa’ai’uga tumau, aua ua le faigofie le lalolagi. Filifili e tautua ma le fa’amaoni i le Alii. Ia filifili i le Atua e manuia ai, ae le o satani e oti ai. Ua o’o i le taimi e faia ai fa’ai’uga tumau mo le manuia o le tama ma le teine i le lalolagi faigata ua i ai nei.

**FESILI E FELAFOLAFOA’I AI -**

1. O ai ni ituaiga tou te iloa na ulua’i nonofo i le lau’ele’ele o Kanana?
2. O le a se uiga fa’atama o Iosua e te matauina i le fa’aupuga o lana lu’i mo Isaraelu?
3. O a ni agasala o lo’o mafua ai ona ola femoumoua’i pea tagata aemaise o tupulaga i nei aso, ua le tumau ai i le Alii?

**FA’ATINOGA O LE MATAUPU -**

1. Pule pea lau Susuga i le fa’agasologa o le mataupu i lona faiga e fai ai felafolafoa’iga.
2. O le fesili muamua - E fitu ituaiga sa ulua’i nonofo i Kanana. - Sa Kanana, Sa Amori, Sa Heti, Sa Perise, Sa Iepuse, Sa Hivi, Sa Kiritase. (Iosua - 11: 3)
3. Fesili e lua - E mafai ona tatou va’ai ia Iosua e pei o se tama ua le lava tauivi, le leai se onosa’i, ua pei o se tagata ua fai mea tu’ulafoa’i, faitalia ia outou po’o ai tou te auauna i ai... Ae i le tasi itu, ua manino mai ai le tama ua ia tapenaina se fa’ai’uga tumau mo ia ma lona

aiga,.....a’o a u ma lo’u aiga matou te auauna i le Alii. O fa’aiuga tumau ua iloa atu ai le manuia o le lumanai.

4. Fesili e tolu - E pei e foliga o le ogatotonugalemu lea o le mataupu i lenei afiafi, la fai nei loa sau fa’ai’uga tumau, aua tatou te le iloa le taimi o le malaga a le oti, Ae fai sau filifiliga tumau, po’o le agasala po’o le manuia, po’o pa’ala po’o le Atua.

**FA’A’IUGA** - Saunia se saunoaga a lau Susuga a le Fa’afeagaiga e ta aofa’i ai le mataupu i lenei afiafi, ma le fa’amalosi e momoli mo tupulaga, ona fa’ai’u ai lea i se tatalo e saunia e se tama’ita’i o le Autalavou.

### **Manuia tele le Aso Sa o Tama, alofa atu.**

\*\*\*\*\*

#### **ASO SA - IUNI 25, 2023 “FA’AFINAUGA” (Debate)**

#### **MATAUPU - “O FEA O VAEGA O LE OLAGA O LE TAGATA E AUPITO SILI ONA TAUA”**

**SINI** - la fa’aogaina pea le metotia o le fa’afinau o manatu e lautele ma tatala ai mafauauga o le tupulaga, ina ia iloa pea le ala tonu e aga’i ai le olaga i le lumanai.”

#### **FA’ATINOGA O LE MATAUPU -**

1. O le fa’atinoga masani lava o finauga, e fai vaega. Mo lenei matuapu, ua ou manatu o le a finau mai i vaega e tolu o le olaga o le tagata o le a tu’uina atu.
2. E talosaga atu fa’amolemole, e lelei pea ona vaevae i tausaga o le a tu’uina atu, e fa’aalia ai lava lagona o le vaega latou e finau ai, o latou e pito sili ona taua le latou vaega i le olaga o le tagata.
3. la tu’uina atu ni minute e fa’asoa ma talatalanoa i vaega i tusi faitau ua tu’uina atu a’o le’i amataina le finauga.
4. la fa’amalamalama i le mafutaga le mataupu, ona ta’ape lea e talatalanoa i tusi ua fai ma fesoasoani, ma toe potopoto ane mo le finauga.
5. O tusi ua tu’uina atu ia fa’ailoa i vaega e fesoasoani mo i latou i le fa’amautuina o le latou finauga i le latou vaega.
6. la manatua o le finauga a le vaega, e finau mai o latou e pito taua i le olaga o le tagata, ae aua le fa’aleagaina fua le isi vaega.
7. Afai o le a ma’ea le mataupu, o le a saunia lava e lau Susuga se fa’ai’uga mo le mafutaga ma tupulaga ia malamalama.

#### **a. VAEGA MUAMUA O LE SOIFUAGA O LE TAGATA. - “TAMAITI” (childhood)**

O le vaega lea o le soifuaga o le olaga e amata mai le tasi le tausaga e o’o atu i le sefulu ma le tolu tausaga. O tusi nei e fesoasoani i le latou vaega - (Salamo - 127: 3, 132: 12, Fa’ataoto - 22: 6, Luka - 9: 47 - 48, 18: 16 - 17)

**e. VAEGA LUA O LE SOIFUAGA O LE TAGATA. - “TUPULAGA TALAVOU” (Adolescence).** O le vaega lea o le soifuaga e amata mai i le sefulufa tausaga e o’o atu i le luasefululina tausaga. O tusi nei e fesoasoani i le latou vaega - (Failauga - 11: 9, 12: 1, 1Timoteo - 4: 12 - 16)

**i. VAEGA LONA TOLU O LE SOIFUAGA O LE TAGATA - “TAGATA MATUA” (adulthood).** O i latou ia e amata atu i le luasefuluono tausaga e o’o atu lava i le matua e mafai ona o’o atu i ai le soifua. O tusi faitau ia e fesoasoani mo i latou - (Fa’ata’oto - 16: 31, 1 Timoteo - 5: 17, 1 Peteru - 5:1 - 2, Kenese - 28: 1 - 2, & 28 - 29)

#### **O SI FESOASOANI MO LE MATAUPU:**

Taumafai pea lau Susuga a le ta’ita’i ina ia aua ne’i fa’apito se fa’ai’uga mo lenei mataupu i se vaega. O si manatu e fia tu’uina atu, *ia fa’atauaina vaega uma o le soifuaga o le tagata.* O le mea

moni lava, e tutusa lelei le taua o le ola mai o le tagata mai lona la'iitiiti se'ia o'o atu ina ua matua o ia. (Silasila ane i le tusi loelu - 2: 28). E mafai ona fa'aaogaina le tusi lea e fai ma fa'amautuina ai lou manatu, i le tutusa lelei o le taua o vaega uma e tolu o le olaga o le tagata. E mafai foi ona fa'aaogaina le fetalaiga a le Alii, "o le faia le finagalo o lo'u tama, o ia lena o lou tama ma lou tina, o lou uso ma lou tuafafine." O le uiga o lea fetalaiga a le Alii, e le taua po'o le a le matua o le tagata, o le mea taua o le faia o le finagalo o le Atua.

**FA'A'IUGA-**

Fa'amolemole fa'aopopo ane e lau Susuga nisi fesoasoani mo le mataupu i lona fa'ai'uga.

**Malo le fa'amalolosi, fa'afetai le fa'aali manatu  
MANUIA LE TUUAGA, TATOU FEILOAI IA AUKUSO, ALOFA TELE ATU MO OUTOU UMA.  
////////////////////////////////////**



**Tautua Printing Press**  
**Congregational Christian Church of American Samoa**  
1 Kanana Fou Street, Box 1537  
Pago Pago, American Samoa 96799  
[www.efkasonline.org](http://www.efkasonline.org)

